

桂苑筆耕集

三





集耕筆苑桂

(三)

著境致崔

編主五雲王

編初成集書叢

集耕筆苑桂

冊三

中華民國二十四年十二月初版

著者 崔致遠

發行人 王雲五
上海河南路

印刷所 商務印書館
上海河南路

發行所 商務印書館
上海及各埠

大

桂苑筆耕集卷十四

淮口鎮將李質充沿淮應接使

淮陰鎮將陳季連充沿淮應接副使

宋再雄差充水軍都知兵馬使

蘇聿補衙前虞候

曹威轉補散兵馬使

許勅授廬州刺史

孫端權知舒州軍州事

朱鄴補討擊使

郝定補衙前兵馬使

客將哥舒璠兼充樂營使

王處順充鹽城鎮使

張晏充廬州軍前催陣使

歸順軍補衙前兵馬使

安再榮管臨淮都

呂用之兼官山陽都知兵馬使

獬豸都將

宿松縣令李敏之充招討都知兵馬使

張雄充白沙鎮將

安再榮充行營都指揮使

徐莓充樞酒務專知

柳孝讓知白沙場樞酒務

行營都虞候

曹鵬知行在進奏補充節度押衙

朱祝大夫起復

上都昊天觀聲讚大德賜紫謝遵符充淮南管內威儀指揮諸宮觀制置

淮口鎮將李質充沿淮應接使

牒奉處分用兵之難。擇利而動。不論遠者近者。須賴犄角之。在安思危。有備無患。前件官名超廣利。勇繼雄飛。自提外戍之軍。每審中權之要。彼徐寇以屢侵吾圍。莫戢其鋒。急之則鼠竄彭墟。緩之則豕僇楚

岸。遂徵衆旅。俾剗羣兇。豈從援溺之權。將助焚枯之勢。爾其指呼順命。擒縱成功。終令入海之波。偏能流惡。乃使映淮之月。早見洗兵。茂賞高懸。良時倏往。勉思委寄。勿負利終。事須差充。沿淮都應接使。便仰量出兵士。討除賊徒。

淮陰鎮將陳季連充沿淮應接副使

牒前件官。勇於戰賊。樂在從軍。操戈而只待春喉。發箭而曾無曠目。自居遠戍。久練雄兵。每聆捍蔽之勞。能息奔衝之患。今則未殲彭孽。猶役楚軍。將資首尾之權。是成蛇陣。固藉爪牙之利。共展豹韜。爾其跡脫五符。身居貳職。專防險道。佇靜長淮。雖云迴繞之川。未是縈紆之地。坐思前哲。猶傳胯下之蹤。立取奇功。好豁胸中之氣。勉期竭節。實謂逢時。事須差充。沿淮都應接副使。便仰量出兵士。討除賊徒。

宋再雄差充水軍都知兵馬使

牒奉處分。舟楫施利。干戈騁威。自古爲難。在今所急。固托縱橫之略。始成捍蔽之功。前件官。學劍有成。彎弧自許。嚼齒而當年逞俊。曳牛而是處爭雄。高列軍門。深遵義路。久居江戍。妙練舟師。今以泗上流災。淮中聚寇。旣犯觀風之境。頗昏映月之流。爾其總握雄兵。遠張祕策。陸織蛇豕。水截蛟螭。早令賊壘皆平。永使驚波不起。用官物而討官賊。吾不爲難。探虎穴而得虎雛。爾當自勗。事須差充。水軍都知兵馬使。部領諸兵馬。討除淮內賊徒。

蘇聿補衙前虞候

牒奉處分。古之有言。以小諭大。則祁奚之請老也。既當問嗣。能自舉親。情不涉於阿私。事何妨於委用。前件官早從吏役。久習武才。父也暮年。既思休退。子之壯氣。可代勤勞。且令職在於早趨。乃欲功歸於歷試。無爽聿修之訓。勉成負荷之規。事須補充衙前虞候。

曹威轉補散兵馬使

牒前件官勇而好禮。勤以從戎。比者逞陳衆之言詞。傳郭維之訊問。果驅險浪。皆赴順風。尋值沛戎來侵。楚壤首登鶴列。深挫豺牙。摩壘而每能率先。殷輪而不欲言病。忠誠勵己。壯節驚人。今則郡守論功。材官受賞。俾昇峻級。用報前功。事須轉補散兵馬使。

許勅授廬州刺史

牒奉處分。良二千石。古難其人。屬郡之中。吾有所試。勤修靜理。今得人焉。前件官自舉六條。已踰四載。邑無吠犬。境絕飛蝗。外令邱井。又安內致。閨門肅睦。政聲則有口者。謔詠仁譽。則無翼而奮飛。遠達宸聰。果霑殊寵。美秩已題於龍劍。雄威愈振於隼旗。既消滌水之災。來作廬江之福。分憂救瘼。能諧聖主之心。紅旆碧幢。豈落他人之手。事須准勅授廬州刺史。

孫端權知舒州軍州事

牒奉處分。昔李弼有言。大丈夫生世。須履鋒刃。以取功名。安可碌碌依階求仕。是乃蓄志能壯。謀身克成。夕脫羔裘。朝驅熊軾。不慙往昔。其在茲乎。前件官族繼興。公術傳武子。能揚俊氣。久練雄師。常安佗佗之

徒果就循循之誘。今則委之郡政。試以公才。既逢豹變之秋。善守龍舒之境。爲邦致理。必見三年有成。向國輸忠。勉令百姓無患。卽迎帝賞。更峻官榮。事須差權。知舒州軍州事。

朱鄴補討擊使納助軍錢遂加職賞

牒奉處分。漢有卜式者。輸家財助軍費。遂乃出自牧羊豎子。終爲司憲大夫。忠誠所施。其利甚溥。前件官石非硤硤。鐵實錚錚。知義重而財輕。遂忘家而報國。天龍地馬。不藏私室之中。尺籍伍符。可列軍門之下。碑昇峻級。以諷頑氓。既有賴於金多。無自驚於銅臭。事須補充討擊使。

郝定補衙前兵馬使能手射七十步

牒奉處分。弧矢之利。武藝所先。號猿而永播嘉聲。落鴈而能傳妙技。況乃只憑五指。能代六鈞。豈唯邁古超今。可謂神功聖術。前件官。早攻手射。善應心機。不彎三百斤弓。能發七十步箭。紀昌若見。必想弣弦。呂布相逢。固慙然筭。既抱非常之伎。佇成可久之功。換滑臺之舊資。陟隋苑之高級。事須補充衙前兵馬使。

客將哥舒瑤兼充樂營使

牒前件官。動彰毅勇。靜保兼中。早成學劍之功。不墜爲裘之業。頗經歷試。無怠聿修。久委賓司。既見與言之可使。俾兼樂職。必期飾喜之克諧。爾其有禮爲先。無荒是誠。迎送於燕臺鄭驛。指揮於迴雪邊雲。勿使英賢。或發養痾之誚。須令艷麗。先緘笑覽之聲。事須兼充樂營使。

王處順充鹽城鎮使

牒奉處分。夫藩鎮之爲制也。中屯銳師。外列諸戍。用備腹心之患。固憑爪牙之勤。前件官深蘊壯圖。挺生勇氣。姜維若在。未占維兒。焦度相逢。應饒健物。每展報恩之節。累申伐叛之功。眷彼鹽城。居於海岸。苟或一同失理。實爲四遠多虞。遂徵處順之名。俾守防奸之任。爾其效勇夫之重閉。致危俗之安居。誓固封疆。無念及瓜之限。但逢寇孽。勉揚破竹之聲。事須補充鹽城鎮使。

張晏充廬州軍前催陣使

牒奉處分。師克在和。兵貴在速。若許緩其善陣。誠爲挫彼奇鋒。用之則行。時不可失。前件官志能傳略。名可止啼。待逢盤錯之難。願展縱橫之術。今則舒猶叛楚。衛已伐邢。雨雖潤於興師。雲未銷於結陣。遂使魚麗猛勢。阻掃氛埃。蟻聚頑徒。敢安窟穴。爾其驅之以馬箠。訓之以豹篇。事唯託於一麾。功必成於百勝。將迎軍賞。佇送捷書。事須差充廬州軍前催陣使。

歸順軍補衙前兵馬使

牒奉處分。前件官身榮豹飾。志習龍韜。奮心於擊鼓。其鏜。聘力於挾軸。以走。早歸信義。無憚勤勞。去正寇據屬城。兵徵諸郡。共誅微孽。各誓前驅。旣遵令於牙璋。宜陟名於甲騎。聊遷職秩。用報軍功。爾其勿替忠誠。更邀上賞。事須補充衙前兵馬使。

安再榮管臨淮都

牒奉處分。西魏王熊。率衆拒寇。乃杖白挺。大呼而詬曰。老熊當道臥。獐子那得過。敵見威勇。果自驚奔。則

知猛將之名。能奪叛徒之魄。前件官夙精韜略。歷試機謀。嘗犯重圍。決成獨戰。實可謂神出鬼沒。豈唯缺左旋右抽。今之武力雖衰。壯心益勵。臨事而猶能強飯。卽戎而寧欲素飡。蠢彼頑寇。騷然侵擾。雖徵衆旅。未建奇功。眷彼臨淮。處於要地。其在訓之以三令。激之以一呼。審詳於彼竭我盈。成就於先難後獲。老驥免嗟於伏櫪。無令鷲馬爭先。秋鷹旣遂於下。麟勿使妖狐得便。事須差管臨淮都。

呂用之兼管山陽都知兵馬使

牒奉處分。仲尼云。寬則得衆。信則人任焉。嘗聆斯語。今見其人。前件官慶襲玉璫。業精金版。遵直道而利有攸往。奉公家而知無不爲。是以晉作新軍。權資處右。齊行勇爵。象許居先。乃裨察俗之規。動叶安民之策。遂得晨羊能飲。夜犬停喧。永除奸濫之源。深得撫綏之道。今以屬城多難。散卒無依。窮猿旣切於投林。飛鳥猶思於擇木。羣情所附。戎略可嘉。俾安其督。督然來實。倚其多多益辦。無辭兩役。用展長才。事須兼充山陽軍都知兵馬使。

獬豸都將

牒奉處分。凡標軍額。須警衆心。如指喻之非宜。則訓齊而何在。況乃均霑好爵。共荷殊恩。跡雖限於柳營。秩盡昇於柏署。宜加一等。俾異三行。前件官壯氣挺生。忠誠卓立。曠弩則前無強敵。荷戈則動有成功。累建戎勳。遂霑爵賞。今以狼星未滅。鯨浪猶翻。將申戮暴之能。用示觸邪之號。爾其勉思一角。永息二心。佇銷封豕之災。勿失神羊之性。事須補充獬豸軍都知兵馬使。

宿松縣令李敏之充招討都知兵馬使

牒奉處分。昔來護者。立性卓犖。初讀詩。至擊鼓其鐙。踴躍用兵。羔裘豹飾。孔武有力。乃捨書歎曰。夫人在世。固當如是。會因滅賊。以取功名。安能區區。專事筆硯。其後果申壯志。累建殊勳。則知奇才所爲。何代不有。前件官。精詳吏道。旁習戎機。假百里之威。則疲甿獲賴。作萬夫之長。則義旅知歸。遂得縣道肅清。鄰藩倚賴。欲破新春之狡窟。遙分江夏之兵權。罷從役於驅雞。佇承乏於建隼。聊加職賞。俾振軍聲。是乃丈夫雄飛。君子豹變。勉驅甲騎。遠應羽書。既設援於他邦。必保安於吾圉。事須補充節度衙前兵馬使。兼充西南招討都知兵馬使。

張雄充白沙鎮將

牒奉處分。昇高自卑。君之所以勵素志。辭大就小。古人所以傳令名。但能守節不虧。固在相時而動。前件官。密懷義勇。深貯謙和。頒條而政有嘉聲。馭衆而軍無愠色。今以新恩未降。銳旅何安。眷彼古津。實爲要路。是成鎮務。乃在江壩。旣居使府之要衝。宜假公才而管轄。況兼場課。可贍軍須。且卷豹韜。共養斬蛟之勇。佇迎鳳詔。別遷建隼之榮。事須差權句當。白沙鎮務。兼知場司公事。

安再榮充行營都指揮使

牒奉處分。昔曹公爲樂府歌云。老驥伏櫪。志在千里。烈士暮年。壯心不已。今猶古也。我得人焉。前件官。百戰成功。一麾出守。曾安海俗。永振風聲。而乃不求更握虎符。唯願終申豹略。豈覺老之將至。每俟用之則

行。今以大愆未殲。外方多難。諸藩命將。無非竹簡探名。遠道徵師。或是葵邱代戍。苟虧忠勇。何蕩妖寇。遂付重權。佇觀奇策。其在身先行伍。顧指軍兵。勉揚矍鑠之名。無致遷延之役。時不可失。往矣敬哉。事須差充行營都指揮使。赴壽州西面備禦。討逐黃巢徒黨者。

徐莓充權酒務專知

牒奉處分前件官發跡戎行。研心吏道。忠勤所至。幹濟可觀。今則舉漢代之權宜。搜杜康之利潤。瞻吾軍用。藉爾公才。既非若處先登。無與衆人皆醉。事須差句當天長縣權酒務。

柳孝謙知白沙場權酒

牒奉處分前件官直道立身。公途勵志。學已窺室家之富。任曾致州縣之勞。今以備食三行。搜資六物。豈使弊歸於下。只令利在其中。勉稟條章。早申績效。俾不欺於釀具。無自陷於醉鄉。事須差知白沙場權酒務。

行營都虞候

牒奉處分前件官勇而好禮。敏則有功。膂力甚強。腹心可委。今以齊驅勁卒。俾剗羣寇。爾其糺摘行間。防虞境外。宜拘小節。善事上官。勿謂忠貞。有乖緝睦。能成勤效。不悛甄酬。事須補充行營都虞候。

曹鵬知行在進奏補充節度押衙

牒奉處分。藩侯所任。邸吏爲先。能傳萬里之音。不墜九霄之命。固憑幹濟。方付重難。前件官魯剗長材。魏

仁雄族。雖處干戈之列。早閑刀筆之能。遂使遠赴行朝。專司遞務。觀六龍之仙蹕。每審巡遊。傳九鳳之王言。曾無阻滯。以茲歷試。深可獎酬。今已秩亞憲卿。官昇典午。身得趨於輦路。職未稱於轅門。俾假牙璋。遙分甲騎。慎達上天之旨。以安外地之心。爾能竭誠。吾不慳賞。事須改補。攝節度押衙。依前知行。在進奏。

朱祝大夫起復

牒奉處分事。繁金革禮奪。直麻魯公制之於前。晉侯行之於後。蓋乃從權順變。是爲移孝就忠。苟不忘家。將何報國。前件官方從戎役。每藉公才。遽鍾風樹之悲。永違霜檜之養。能動泣血。唯恐奪情。然以羣寇未殲。列藩多事。確執三年之愛。仰辜萬乘之恩。況承勅命指揮。已許軍前驅使。出如綸之睿旨。既俟成功。衣夫錦之格言。豈同前哲。時異事異。念茲在茲。揚名顯親。竭力從命。孝之終也。往矣敬哉。事須牒舉起復。差往五嶺已來。領會軍前公事。

上都昊天觀聲讚大德賜紫謝遵符充淮南管內威儀指揮諸宮觀制置

牒。大德眞璞混成。靈源廣潤。淘俗態於心水。瑩仙姿於面冰。蓬島神仙。應待銜杯之樂。茅家兄弟。敢攀執袂之遊。猶思救苦於寰中。尙阻追歡於物外。屬以陣蛇出穴。戎馬生郊。每勤齋敬之心。深假護持之力。達聖聰而有謂。施醮禮以無虧。今則秦嶺煙昏。難尋四老。楚淮月皎。幸伴八公。但以桂苑繁華。揚都壯麗。既見星壇月殿。處處荒摧。難期鶴駕霓旌。時時降會。欲設精嚴之備。須資揚統之權。白馬將軍。方役大朝之元帥。青牛道士。暫充下界之仙官。比年既遂於攀留。他日必同於輕舉。事須請充淮南管內威儀兼指揮。

諸宮觀莊田等務。

桂苑筆耕集卷十五

齋詞 一十五首

應天節齋詞三首

上元黃籙齋詞

中元齋詞

下元齋詞二首

上元齋詞

中元齋詞

下元齋詞

黃籙齋詞

禳火齋詞

天王院齋詞

爲故昭義僕射齋詞二首

應天節齋詞三首

道士某乙言。伏以聖人降生。王者嘉應。包天地之大德。啓日月之殊祥。是以電繞虹流。克符龍質。握乾披震。允叶龜書。伏惟聖神聰睿。化哲明孝。皇帝紫府真宗。丹陵寶命。孝理而勤修一德。化成而肯悅萬方。偶以犬吠堯威。熊驚漢御。猶軫泣辜之念。暫勞展義之行。今者風振南薰。方在長嵐之節。星瞻北斗。乃當誕慶之辰。莫不山靈供萬歲之歡聲。河伯獻千年之瑞色。仰資聖壽。敢設仙齋。廣成子之微言。旣傳衆妙。華封人之善祝。實繁羣誠。伏願德乃日新。禍當天悔。暫興時雨。遍洗妖氛。高整鸞旗。早迴鳳輦。然後搜濟汾之詠。撰封岱之儀。傳芳於玉葉金枝。積慶於天長地久。使蠻戎率服。蠶植咸蘇。仰沐華胥之風。齊登仁壽之域。普天率土。永賀昇平。

又

道士某乙言。伏以父天母地。帝道所以爲尊。貫月繞星。靈符於是乎在。況覩一人有慶。固知萬壽無疆。伏惟皇帝陛下。龍握不圖。鳳資聖紀。播休聲於里社。標盛禮於高禩。今者風調舜琴。日緩羲轡。歷草舒芳於八葉。丹陵降瑞於千齡。謹設仙齋。仰陳善祝。伏願塵銷九野。波息四溟。早迴西幸之儀。便舉東封之禮。一千年之休運。高建武功。三十世之昌期。倍延福祚。允諧大定。永賀中興。

又

伏以瀨鄉白鹿。旣掛仙蹤。函谷紫雲。果資王氣。積慶於天長地久。傳華於聖子神孫。耀玉京而我李長春。演金籙而莊椿永茂。伏惟皇帝陛下。三無稟德。萬有覃恩。叶感星夢日之祥。掩四乳八眉之瑞。上天降聖。

爰乘解慍之風。列士修齋。況值晏陰之月。伏願峒山順軌。汾水迴鑾。迎萬歲之巖音。歸九重之天闕。享七百年之休運。寰宇中興。守五千字之格言。兵戈大定。仰祈元鑑。永護皇居。

上元黃籙齋詞

年月朔。啓請如科儀。伏以有德不德。無名可名。自施倏忽之功。莫究希微之旨。是以紫府乃修心可到。元關非用力能開。臣志慕真風。躬行正道。但以漢良前筭。猶勞戰伐之謀。越蠡扁舟。未遂優閒之望。旣榮人爵。須報主恩。誓殲無賴之徒。久練不祥之器。動拘俗役。慮犯元科。今則節已及於上元。災未銷於下界。謹修常醮。仰貢微誠。所願梟覆頑巢。鳳迴仙駕。帝座與三台永耀。王畿與九牧皆安。雷驚而蟄戶全開。風掃而妖氛靜息。俾臣靈根日茂。至業天成。虎符提闔外之權。終安澤國。虹節指壺中之境。得認家山。臣無任虔肅禱祠懇悃之至。謹辭。

中元齋詞

年月朔。啓請如科儀。伏以道本強名。固絕琢磨之理。身爲大患。深驚寵辱之機。能審自然而然。必知無可不可。是以雕辭贊美。則乖妙旨於混成。矯志求真。則爽奇功於積學。冀標玉籍。在守金科。臣才謝半千。雖慙賢路。心擬正一。早叩元關。齋誠於八節三元。鍊志於龍緘鳳蘊。但屬鯨翻逆浪。蛟噴毒沙。數年與蠱螫之災。萬姓抱瘡痍之苦。三尺劍高提在手。須救危時。六銖衣輕掛於身。未諧夙願。今謹因中元素節。大慶良辰。依寶壇而醮設常儀。企仙闕而拜申精懇。伏願真風蕩滌。元澤滂流。吾君享萬歲於巖音。賢相耀六

符於渭訣。調舜絃之美化。永復歲期。漏湯網之兇徒。咸歸顯戮。然後戴髮含齒。鱗潛羽翔。不知日用之功。各遂天成之樂。俾臣代勳善繼。真位高遷。留形於煙閣雲臺。縱賞於芝田蕙圃。鑄金追想。終榮聖主之恩。叱石閒遊。得效仙人之術。儻非過望。敢不精修。臣某無任祈恩謝過。虔禱懇悃之至。謹辭。

下元齋詞

年月日啓。請如科儀。伏以教資妙用。無爲而無不爲。道在勤行。不厭是以不厭。苟得捧持三寶。必能極護萬靈。須憑善建之根株。始覩混成之闢闔。故曰大丈夫處其厚而不處其薄。居其實而不居其華者也。臣雖塵役拘身。而雲裝掛志。大成是望。上達爲期。每依郭璞詩中。精調五石。願向葛洪傳上。得寄一名。所以仰欽象帝之先。豈在他人之後。聽爛柯翁之說。則倍惜光陰。覽抱朴子之言。則不虧忠信。但以卑棲俗累。深握兵符。政刑之得失難調。賞罰之重輕易忒。暗堆懋咎。莫補精修。況叨真位之榮。恐負元科之責。是以三元八節。顯醮遙祠。唯期致力於九層。未曾妨功於一簣。今則天吏叩應鍾之候。水管攬元轡之時。月數就盈。日辰在望。仰投靈地。敬設寶壇。備儀於琳几瓊盤。注賞於金臺銀闕。冀感通於良夕。能濟援於危時。伏乞太上三尊。十方衆聖。曲垂元鑑。俾遂丹誠。早迴翠輦於長安。復振皇風於正始。秉陶鈞者永諧德化。仗節鉞者共戢兵戎。波濤靜寢於四溟。氛霧豁開於九野。樹下有推功之將。草閒無求活之徒。至於翔翼躍鱗。跛行喙息。偕登仁壽之域。不躡昏迷之途。使臣深結道緣。遙申齋願。望三清於通路。資一溉於良田。此時枕越石之戈。暫妨高臥。他日把浮邱之袂。豈訝後來。臣某無任瀝懇投辭。虔禱惶切之至。謹辭。

又

年月日啓請如科儀。臣伏以測管窺天。雖乖曠望。揮戈駐日。蓋感精誠。苟爲山之力不虧。則至海之期何遠。仰元門之善閉。遵妙道以勤行。但以爲子爲臣。曰忠曰孝。旣增榮於國祿。願無忝於家勳。手握玉符。且救寰中之難。志棲金籙。唯思象外之遊。每慮政失務三。法虧畫一。雖慎撫綏於南竟。尙多憊咎於北。況當翦寇爲期。弭兵未暇。今則月就盈數。日臨下元。遙做真儀。敬陳齋法。儼星壇而稽首。想風馭以馳魂。伏乞太上三尊。十方衆聖。元德見蔭。良願克諧。翠華早耀於秦雲。皇祚永興於漢日。百官多慶。八裔同歡。寇戎則銷燧象之灾。幽滯則假燭龍之照。然後使臣世官貞吉。道業滋成。遺榮待泛於五湖。企想潛通於三島。作人間之都尉。蒯訓無心。拜天上之侍郎。沈羲有望。唯願在家必達。終能直道而行。臣無任祈恩懺罪。虔切惶恐之至。謹辭。

上元齋詞

年月日啓請如科儀。臣仰察元經。乃見道資衆甫。俯稽聖典。則知神應至誠。是以早詳病病之言。每勵賢賢之行。五音五色。實除耳目之娛。六甲六丁。潛致爪牙之役。願躡輕飛之路。常敲衆妙之門。但屬戎馬生郊。陣蛇奔穴。無苟免而臨難。不得已而用兵。蓋報主恩。慮虧臣節。只誓顯誅寇孽。寧知暗積憊殃。雖軍律克申。而真科是懼。今以日延和景。月滿初元。遇吸新吐。故之辰。懺喙腐吞腥之罪。儼陳醮禮。敬薦齋誠。燈耀九光。燼焚百和。寂寥塵外。幡幢靜設於星壇。髣髴雲中。環珮似傳乎風馭。冀銷妖祲。仰告威靈。伏乞大

降元慈。下從丹懇。萬乘永資於萬壽。百官皆荷於百祥。戰場則荆棘叢生。農壤則麥禾花茂。凡云蠢動。盡獲昭蘇。然後俾臣援溺功成。奉身以退。沖靈道途。鼓腹而遊。飽瓊藥之餼糧。就瑤臺之蹊徑。遇圯上者終諧素志。自有前蹤。入壺中者蓋感專心。寧無後望。既殊捕影。敢憚勞形。臣無任悔過祈恩。虔切惶恐之至。謹辭。

中元齋詞

啓請如科儀。域中之四大難名。字之曰道。物外之三清在。想心以爲齋。豈徒滋福於一身。唯願洽恩於萬彙。臣生逢聖日。志慕真風。寧貪久視之門。有覬輕飛之路。但以行先不殆。德貴有餘。每虔一氣以存思。非止三元而展敬。今則雲摧火影。風戛金聲。當中元積慶之辰。謹修常醮。以下界罹災之事。仰告元慈。一昨夏景既闌。秋成甚邇。而乃曠野則飛羊斂翅。深泉則黑蜃藏鱗。嗷嗷之黔庶何依。烈烈之蒼穹莫訴。雖近沾美澤。而尙懷農郊。伏乞太上三尊。十方衆聖。下從精懇。大庇生靈。使風雨常調。煙塵永息。興聖祚於千秋萬歲。振歡聲於四海九州。然後俾臣功名則與國同休。道業則在家必達。水中泛泛。謝時態之澆浮。雲外飄飄。逐仙蹤而蹇翥。既探珠而有望。寧種玉以無因。臣不任祈恩救災懇禱虔惕之至。謹辭。

下元齋詞

啓請如科儀。伏以混成至道。本在勤行。衆妙元門。唯資善閉。故曰修之身。則其德乃貴。修之國。則其德有餘。既能事少功多。可謂暫勞永逸。臣雖手提金鉞。而心寄瑤臺。飄飄然自有良期。擾擾者誰知積學。是以

三元致敬。一氣存思。佇天上之雞聲。潛縣素望。待海中之鶴信。每瀝丹誠。終冀用之則行。豈言深不可識。今者謹賈薄禮。仰贖元慈。所願漸茂靈根。漸拋俗界。餌崦嵫之奇草。飲沆瀣之仙漿。漢代淮王。終遂仙游之樂。周時柱史。何妨吏隱之名。苟保天成。何言日損。景仰於其中有象。願知於此外無求。臣無任投辭懇迫。虔禱兢越之至。謹辭。

黃籙齋詞

啓請如科儀。臣身拘俗網。志仰真筌。雖窈窕冥冥。至道則無形可叩。而勤勤懇懇。精心則有感必通。是以每勵焚修。敢安晷刻。所冀學海而終歸巨海。好龍而不懼真龍。豈貪輕舉之名。但效勤行之旨。然以早分相印。久握兵符。當扶危靜亂之秋。有戮暴誅奸之役。伏慮政條失所。刑律乖宜。僣違暗積於元司。殃咎難逃於黑籍。今則景銷木德。節啓火威。稽首昊天。叩心靈地。踟躕而謹陳薄奠。禱祠而仰獻微誠。伏乞太上三尊。十方衆聖。俯矜丹慊。深降洪慈。使電滅千災。雲興百福。永資元蔭。漸茂靈根。掃闔外之煙塵。早成勳業。玩壺中之日月。免役夢思。臣無任悔過祈恩。懇迫惶恐之至。謹辭。

禳火齋詞

年月日。啓請如科儀。於紫極宮內。修建洞淵妙齋。三日四夜。轉經行道。爲禳當府火災。祈恩投辭。上詣虛無元始天尊。伏以波蕩四溟。塵昏九野。遂見綿區匝宇。未能滅禳消氛。臣雖志悅道風。而身沾睿澤。早託山河之誓。久臨淮海之封。每慎撫綏。不遑寧息。粗安一境。已涉五年。齋誠仰貫於上元。妖氣願銷於下界。

豈料天心悔禍。必俟時期。地分罹殃。難逃歷數。方當暮月。始起融風。遽興鄭國之災。難施瓊瑩。將救成都之急。誰啜酒杯。所燃既多。俱焚是慮。衆力猶勤於撤屋。羣心免駭於燎原。今則每念傷人。唯知罪己。仰投靈宇。敬醮寶壇。祓禳異於四郊。寧拘古禮。祈禱遠瞻於三島。但獻精誠。伏乞太上三尊。十方衆聖。曲流元澤。大挫陽精。使回祿知非。祝融請罪。閭閻撲地。皆除火宅之災。道路生風。永作水鄉之福。烝黎樂業。師旅懷安。構陰謀者。自就消亡。歸善化者。名資榮泰。齊登壽域。仰望仙鄉。臣無任歸罪乞恩。虔禱懇迫。惶恐之至。謹辭。

天王院齋詞

唐中和二年。太歲壬寅正月望日。具銜某。敬請僧某乙。設齋於法雲寺天王院。謹白言。舍利佛。大慈大悲。觀音菩薩。伏以欲界將傾。魔軍競起。九野塵昏於劫燼。四溟波蕩於狂飈。諸侯志慕於宋公。星無三徙。聖主德齊於漢帝。日未再中。不知天養鴟梟。地容螟螾。力鬪之羣兇。得便。義征之衆旅。摧威某也。手握兵符。心抱將畧。欲展焚枯之力。願成拯溺之功。是以景仰三歸。勤行十善。深憑護念。敢啓邀迎。宇內瘡痍。略假醫王之術。世間疲瘵。遍希慈父之恩。今則幸遇初元。精修美供。春露灑琉璃之境。曉風吹薝蔔之香。想其舍衛城中長老。盡攜弟子。水精宮裏天王。便作主人。伏願舍利佛。大慈大悲。觀世音菩薩。教既東流。跡能西降。遠救閻浮之地。暨離兜率之天。問疾語言。不競維摩之時。稱名功德。可逃羅刹之災。惟願共泛慈航。齊揮智劍。寢驚濤於苦海。掃妖氣於昏衢。則乃慧燈照天帝之心。法鼓破波臣之膽。靜銷諸惡。暫開方便。

之門。廣庇衆生。無惜慈悲之室。謹疏。

爲故昭義僕射齋詞二首

中和二年七月二十三日。爲故昭義姪孫僕射。及二孫子。敬設齋于法雲寺。聊憑法疏。用寫悲詞。以昭義姪孫。幼蘊壯圖。長居重任。不掃一室。有志四方。手運豹韜。既是吾家之事。身持龍節。累沾聖代之恩。至於越海征蠻。對河分陝。立戰功於遐徼。傳理化於近藩。慎守詔條。能諧物議。遂移上黨。實委外權。尋屬戎馬生郊。陣蛇出穴。遽聆寇孽。直犯京華。頻興伐叛之師。稍急訓戎之令。上將則雖期徇難。欲竭忠誠。小人則多是幸災。潛興狡計。叛徒忽至。橫禍斯侵。宏演納肝。其誰能繼。豐舒傷目。所不忍言。噫。道則日彰。志惟天奪。征旌永卷。飛旆爰來。言念凋零。莫勝悲慟。但以推尋佛理。仰割俗情。既知前世因緣。粗解此時冤痛。況乃父立忠節。子揚孝名。古賢所稱。今我所恨。俾資冥福。敬設妙齋。所願慧炬照迷。慈航援溺。早推誠於貫日。終致樂於生天。子子孫孫。永絕怨讎之本。生生世世。常逢安泰之期。謹疏。

又

中和二年七月二十七日。某官某乙。奉太尉處分。爲故昭義僕射。於法雲寺設三百僧齋。並寫金光明經五部。法華經一部。永充供養。蓋聆佛修慧力。普濟羣迷。人發信心。終成善願。苟得影從。至教必能響答。虔誠伏以。昭義僕射。夙振雄圖。繼分重寄。將軍投袂。練兵而方切專征。天子翦衣。飛詔而唯憑妙略。佇建設中之勳業。忽罹意外之災殃。不弔昊天。奪我良允。今則敬投蓮宇。虔設桑門。仍缺貝葉之真蹤。仰奉法華。

之妙義。伏願乘茲功德。解彼冤讎。災星昔照於豫州。已推定分。慧日今懸於覺路。永絕良緣。謹疏。

桂苑筆耕集卷十六

唐高麗都統巡官侍御史內供奉崔致遠撰

祭文四首

祭五方文

築羊馬城祭土地文

祭楚州陣亡將士文

寒食祭陣亡將士文

書二首

移浙西陳司徒廟書

手札一首

記二首

西州羅城圖記

補安南錄異圖記

疏二首

求化修大雲寺疏

求化修諸道觀疏

祭五方文

年月日具銜某謹以清酌庶羞量幣之奠敢昭告於五方神之靈傳不云乎五行之官是謂五官封爲上公祀爲貴神社稷五祀是尊是奉木正曰句芒火正曰祝融金正曰蓐收水正曰元冥土正曰后土是以禮云共工氏之霸九州也其子曰后土能平九州故祀以爲社然則神主順天靈功莫測諸侯列土祀典宜行惟夫人實統陰祇廣合坤德身爲萬物之母首冠五方之君職奉軒皇功標缺社殷湯罷改遷之議漢武陳祠祭之誠是知神鑑則無偏無頗物情則以享以祀昔平九土既能疏決江河今處五方豈不庇安淮海靈其調和於金木水火驅役於風雨雪霜使春夏秋冬永息災殃之氣東西南北靜除氛祲之源牢幣具陳庶羞甚潔致敬不虧於中靈施恩幸滿於大藩唯候豐穰冀申報賽尙饗

築羊馬城祭土地文

年月日具銜某以兵戎未息禦備是勤乃命修築羊馬城遂遣某官某乙告於土地之神曰夫城郭之設邑居所憑陋之則狡者或缺美之則寡能固守況今豺聲競發虺毒遍吹易動難安何處能爲樂境暫勞永泰此時須建良功遂乃揣高卑議遠近便令百堵皆作終可三旬而成徵名於伏櫪觸楹接勢於長雲斷岸不假龜行之跡豈須龍見之期衆旣叶心事無費力神其德惟博載道實流謙勿辭板築之喧勉致

金湯之固。使雲鑿雷杵。遠振歡聲。烏堞隼墉。高標壯觀。北吞淮月。南吸江煙。平欺鐵甕之名。迴壓金甌之記。有備無患。神其聽之。

祭楚州陣亡將士文

爾等尺籍從軍。寸心報國。羔裘武飾。旣以力稱。馬革雄圖。早將身許。爰有徐孽。來侵楚封。春喉之壯氣。未申。失手之冤聲。遽起。始見荷戈就列。翻爲復矢成行。然而功其可稱。死且不朽。有狼曠之君子。無羊斟之小人。昔時之重義。輕生。不求苟活。今日之名存身喪。豈貯遺悲。魂其有知。各歆薄醑。

寒食祭陣亡將士文

嗚呼。生也有涯。古今所歎。名之不朽。忠義爲先。爾等曠弩勞身。蒙輪逞力。奮氣於熊羆之列。忘形於鵝鶴之前。能衍勇於干戈。固免慙於牀第。今也野草綠色。林鷺好音。杳杳逝川。空流恨而無極。纍纍荒塚。誰驗魂之有知。我所念兮。舊功勞。我所傷兮。好時節。俾陳薄醑。用慰冥遊。共謀抗賊於杜回。無效懷歸於溫序。能成壯志。是謂陰功。

移浙西陳司徒廟書

滔滔逝水。幽顯雖殊。凜凜雄風。古今何讓。苟或同心立事。必能異代論交。司徒壯節奇功。備載外孫之碣。靈恩顯驗。高傳太伯之鄉。譚揚而不假再三。徵引而難窮萬一。今則冀動元鑑。直書素誠。旣當可舉而行。固在不言而信。且此誓除國難。齊命舟師。將泛西江。卽離北岸。練鋪一水。指疆界以雖分。黛列千山。望威

靈而如在。今於敵境。已立嚴祠。敬迓來儀。迺酬前願。幸移玉趾。無戀石頭。桂檝蘭檣。早決遷居之計。鸞絲鳳管。佇申迎奉之儀。況乃近境無虞。芳筵不絕。但得禍淫福善。何妨捨舊從新。北渚煙花。休起別離之恨。東塘風月。好追歌舞之歡。必能依統帥指揮。永可振司徒勳業。特差專介。用啓至誠。昔之青骨標奇。已謂陰陽不測。今也赤眉稔惡。豈宜征戰無功。將申烈烈之威。實假冥冥之助。所冀八公山上。遍設雄師。五里霧中。能呈異術。則必陰子春之破賊。吳大帝之封王。共立功名。若合符契。無誤會稽之軍備。有慙卽墨之神謀。早詳禴祭之言。永副里仁之義。某白。

手札

風煙雖邇。雲霧難披。景仰靈威。遙申誠願。今已靜搜勝地。高創壽官。永可安居。謹令咨迓。便請挈家速至。專當掃席相迎。且鐵甕城低。金陵地狹。能施百福。無滯一方。此欲劍拂妖星。旗迎聖日。必期大捷。永致中興。幸其來助陰兵。共成王事。目極東流之雪浪。心馳北顧之煙峯。神兮移來哀江南。某白。

西州羅城圖記

西州羅城。四仞高三尋。闊周三十三里。乃今淮海太守燕公所築也。粵若梁州別壤。蜀國雄都。內跨犍犍。外聯蠻蠻。左臨百濮。右挾六戎。咽喉之控。引實繁。唇齒之輔。依難保。自昔鼈靈流異。龜跡標奇。藩籬始建。其一城。局鏑猶虧於四郭。莒子則既忘重閉。衛人則唯慮徙居。蠢彼狗封。恣其狼戾。每至草乾。麩道浪縮。瀘河則必椎紿橫侵。撥羣驅隊。編毗攝竄。巷哭街號。戎兵以拔旆爲中權。府尹以閉關爲上策。稔成氛祲。

積有歲時。洎乾符初。偶絕羈縻。大興作奐。白虎之狂。災漸熾。黃龍之舊。約難尋。兵力莫申。帝心有寄。以公慶傳渭夢。業練圯書。交趾銘勳。則永威八詔。郟城報政。則不待三年。屬蠻寇加囂。王師告老。遂飛急詔。請

救倒懸。由是自東徂西。以晝繼夜。走單車於外境。豈煩龔遂獻書。受戎輅於中塗。莫掩管侯稱伯。公郟行次咸陽

川節制。除授西遙銜睿略。倏達成都。於時驃信屯兵。逼郊遂而纒踰一舍。黔黎失業。焚里閭而何雷萬家。彼則

舉國而濟師。此則闔城而受弊。外熾崑岡之焰。噴酒無能。內枯疏勒之源。指梅何益。莫非枕倚牆壁。誰堪

擐執甲兵。公至止之日。豁啓城扉。若開籠檻。威振而寧。勞利器。邪膽皆摧。化行而如嗅。新香。驚魂盡返。蠻

王以鑿耳飽聆其異略。鏤膚畏挂於嚴誅。洵然觀電懼雷。歛爾鳥飛魚散。公尋令選銳。暫使追逃。乘其垂

翅之時。展我燎毛之勢。數俘莫記。執馘居多。爾後因閔地圖。得搜天險。是猿狖養窩之窟。爲豺狼伺隙之

蹊。乃令一剏雄關。一標巨防。修防峽關。置平夷鎮。蠻賊要路。固守無虞。危堞則憑巒助峻。長溝則導澗資深。宛成善閉之

機。實扼間行之徑。丸泥可固。斷知無得而踰。燿火罷驚。坐見不爭而勝。仍尋水道。別建河營。大渡河側。置防河營。

遠方猶夏之徒。難謀航葦。均發戍申之卒。免詠流薪。疆陲永保。於覆孟。塵閭唯矜於列鼎。卿雲邦彥。聞吟

搜吐鳳之詞。卓鄭鄉豪。靜坐貯蹲鴟之利。公以寢處戎闌。夢想扁舟。將申遠慮。於無窮。豈立空言爲不朽。

乃曰彼蠻之習也。外癡內黠。朝四暮三。雖莊叔此時。功已成於長狄。而季孫他日。憂必在於顯臾。詎可虛

號錦城。尙無羅郭。守民之制。非我而誰。啓抱而神欽。至誠飛章。而帝允丹請。時有賓寮進難。將校獻疑。皆

云公孫述躍馬雄臨。非無意也。諸葛亮臥龍崛起。亦有志焉。但以曩築子城。猶資客土。九月方就。百代所

難。蜀缺無土。日昔張儀築子城。盤土於學射山。日役往返。九載後始成。況今將興廓落之基。恐致遷延之誚。公曰術缺先定。事當速成。

必能終簡天心。豈謂虛穿地脈。於是郡侯奔告。邑尹樂從。乃使揣高卑。議遠邇。慮材用。量事期。採時候。於

魯書。佚規模於周令。引長江而副長塹。夏禹慙能。對高巘而劃高墉。秦皇失色。矧乃命五丁而嘯侶。運六

甲以驅神。天吳則謔水於寒泉。地媪則變沙爲美土。蜀地穿未盈尺。泉缺漲起。至是土出沙中。城源如舊。實謂百靈幽贊。萬姓

悅隨。鋪聚雲濃。杵騰雷響。不見烈風淫雨。又令筮飽觴酣。登登而只競歡呼。屹屹而便如湧出。百堵皆作。

三旬而成。然後郢匠勞功。素材變質。優人展妙。積壤凝華。攢空而烽櫓高排。架險而闐闐聳起。橫分八尺。

結雕甍而彩鳳聯飛。檻徹四隅。擁繡堞而晴虹直挂。罩一川之佳景。籠萬戶之歡聲。遠而望焉。則巍巍峩

峩。若雲中之疊嶂。錦霞縠霧。隱映乎其上。迫而察也。則嶙嶙燁燁。想海畔之仙山。金臺銀闕。焜耀乎其間。

始自庀徒。終於解役。不假朽緡於官稅。無資剖粒於軍租。築板所費。錢一百五十六萬貫。米一十九萬石。皆由智計。不假上供。皆聚

羨財。儼成壯觀。遂使蠻酋褻魄。賈旅歸心。不敢言摩壘而旋。無因致入郭之役。爰徵繪事。仰貢九重。旋降

綸言。過褒一字。宣睿旨於翰林才子。綴妍辭於黃絹外孫。築城碑。今租庸王相公。承旨撰詞。公雖迎金鳳銜書。未議石

龜戴版。蓋乃謙沖自牧。恥其功伐驟稱。及蒼鳥高飛。翠華遠狩。儼仙遊於玉壘。安聖慮於錦城。故得親覽

宏規。益欽忠節。特傳瑤檢。微進碑詞。遂命雕鐫。永揚威烈。實萬古未聆之事。乃四方無比之榮。美矣哉。龍

以雲興。魚因水樂。誰不仰公。智周物表。事照機先。凡施權謀。若合符契。在昔全蜀未城也。天留盛績。日待

英才。所謂有非常之人。然後有非常之事。有非常之功。是以非常者。固非常人之所覲。

也。致遠雖邱堂觀奧，師冕何知，而秦國斂賢，由余不棄，謹成實錄，敢記殊庸，所冀四海梯航，閱雄圖而稽頽，九州旄鉞，望法駕而安心中，和三年，龍集癸卯八月二十五日記。

補安南錄異圖記

交趾四封圖經詳矣，然而管多生獠，境邇諸蕃，略採俚譚，用標方志，安南之爲府也，巡屬一十二郡，峯驩陸長郡諒武定武安蘇茂虞林，武羈縻五十八州，府城東至南溟四百餘里，有山橫亘千里而遙，邃穴深巖，爲獠窟宅，蠻獍之衆，六種星居，鄰諸蕃二十一區，管生獠二十一輩，水之西南則通閩婆大食之國，陸之西北則接女國烏蠻之路，曾無亭堠，莫審塗程，跋履者計日指期，沈浮者占風定信，二十一國，雞犬傳聲，服食所宜，大較相類，管內生獠多號山蹄，或被髮鏤身，或穿臂鑿齒，訛音嘲嗜，姦態睚眦，其中尤異者，臥使頭飛，飲於鼻受，豹皮裹體，龜殼蔽形，擣木絮而爲裘，獠子多衣木皮，熟擣有如織繡，編竹筍而作翅，生養則夫妻代象，長成則父子爭雄，縱時有傳譯可通，亦俗無桑蠶之業，唯織雜彩狹布，多披短襟交衫，或有不縫而衣，不粒而食，死喪無服，嫁娶不媒，戰有排刀，病無藥餌，固恃險阻，各稱酋豪，遠自漢朝，迄於隋季，荐興邊患，頗役遐征，馬將軍標柱歸時，才分地界，史總管倒碑過後，略靜海隅，泊咸通初，驃信挺災，元戎喪律，嗚嘯於跼，爲之地，豕虺於束馬之塗，摧兇欲快於椿喉，拯溺唯思於援手，先帝以今淮海太尉燕公，威宣大漠，政洽上都，時公防禦秦城，刺平醜虜，乃請出鎮龍編，立身豹略，刻彫題而卵碎，活黔首以肌豐，復壁壘於一麾，拔才歸輦下，出鎮安南，朱道古稔姦於外，杜存凌恣虐於內，皆爲安南巨患，公乃誅滅封疆於萬里，有蠹皆削，則冤不伸，無遺，故緒令公遂良，竄殺日南，子孫凋零，公特表洗雪。

然後使電母雷公。擊外域朝天之路。山靈水若。偃大洋沃日之波。安南經。峇口。天威神。播在遠邇。遂得絕蠻謀之北窺。紆漢軍之南戍。乃鳳傳徵詔。鶴泛歸程。至於洞窺海蠻。莫不醉恩飽義。遠投聖闕。請建生祠。則知善政所行。殊方可誘。既見馬如羊。而不敢縱。令蟻若象。而何虞。足以驗四夷之時。或不賓九牧之任。不得所也。有柔遠軍從事吳降。嘗集是圖。名曰錄異。敘云。久客遐蕃。目擊殊形。手題本事。然則信以傳信。斯焉取斯。缺閱前詞。退而歎曰。愚之所以爲異者。其諸異乎人之所異。曰六合之內。何物則棄。至如鼠肉萬觔。蝦鬚一丈。既知南北所產。永釋古今之疑。則彼獸性羣分。鳥聲類聚。誠不足異也。頃太尉燕公。受三顧恩。用六奇計。使獷悍歸服。邊陲晏然。今聖上省方。蒙王獻款。不敢弄吠堯之口。永能除猾夏之心。皆由燕公收交州。鎮蜀郡。威振於奔虺。走魅。功成於金壘。湯池。所謂蘊元見之能。察未來之事。呼吸而陰陽不測。指蹤而神鬼交馳。實爲天工人其代之斯。實可爲異矣。聊補所闕。敢貽將來。時翠華幸蜀之三載也。

求化修大雲寺疏

大雲寺募緣求化重修建瓦木功價等。詳夫教列爲三。節居其一。其如妙旨則暗裨元化。微言則廣諭凡流。開張勸善之門。解摘執迷之網。然則欲使衆心歸敬。須令像設莊嚴。有感必通。無求不應。墾情田而種福。游法海而消殃。不可思議。於是乎在。當州城西大雲寺。雖臨楚甸。實壓蜀岡。舊創仁祠。高標兌位。兩洗煙窗之色。萬朶前山。風敲月砌之聲。千株古木。在一郡乃偏爲勝景。於四時則最稱芳辰。至如春水綠波。雜花生樹。都人士女。以遨以遊。不勞聽法之緣。自得消憂之所。則與城東禪智寺。雙肩對聳。兩耳齊張。夾

煬帝之遺宮。擁淮王之仙宅。壯茲樂土。倚彼福田。前年偶值飛蝗。未能避境。旋又聚蟻。或欲毀堤。故護軍特進。以將隔妖氛。忽興猛焰。遂使瑠璃之界。釀成煨燼之餘。雖菩薩焚身。固爲常事。而苾芻住足。盡失安居。可惜祇園。便同隙地。今幸遇太尉。將驅衆旅。佇滅羣兇。既逃過去之災。或補未來之福。欲安盛府。許葺精廬。欲使爐續朝香。鐘迎夜梵。樹宿獼猴之友。林棲鸚鵡之王。蓋因貞觀之中。曾傳帝語。豈效太清之末。酷信伽譚。所願廣運慈航。徐搥法鼓。深資功德。靜剗妖魔。百官榮從於鸞旌。萬乘遄歸於象闕。次願太尉。廊清寰宇。高坐廟堂。演伽葉之真宗。龍堪比德。舉儒童之善教。麟不失時。克興上古之風。永致大同之化。凡於戴髮含齒。鱗潛羽翔。皆號慈悲。能盡解脫。但以一毛可拔。先求信義之心。百足不僵。須賴扶持之力。既難獨辦。固托重緣。無吝羨財。合資洪福。富者不仁之說。自古所譏。積而能散之規。於今可誠。謹疏。

求化修諸道觀疏

繫極宮重修城下諸宮觀求化瓦木等價。伏以苦縣誕靈。神州演法。真性乃聖朝之祖。強名爲至道之宗。玉葉金柯。耀芳陰於萬代。瑤甬瓊笈。傳妙旨於四方。遂得齋醮有歸。科儀無墜。神宮靈宇。宛寫諸天。祕殿精壇。嚴修勝地。當州東吳麗俗。南兗雄藩。鮑參軍則賦街精妍。揚執戟則箴誇天矯。而乃至道少勤行者。元門無善閉之味。澹口中動成大笑。義深目外。誰信上昇。福庭則草沒塵侵。仙室則雨傾風壞。況值梟聲競噪。虺毒強吹。到處星飛。但見羽書之急。經年霧集。唯聆甲騎之勞。俗旣喧驚。教增寂默。未有葺修之暇。非無捨施之緣。今幸遇太尉。德繼猶龍。道深有象。黃石公之妙訣。雅稱帝師。赤松子之勝遊。佇迎仙友。是

故出則以六奇除敵。入則以九轉服勤。靜制闔外之煙塵。間對壺中之日月。三元遵敬。一氣精修。果見眞位高遷。殊祥荐降。彩雲片片。飛來楚岫之風。元鶴雙雙。唳向隋宮之月。又乃前年則江寇南逼。去歲則淮戎北侵。蟻皆恃於成羣。蛇欲驚於結陣。伏賴太尉雄威坐振。衆孽奔亡。四鄰戴信於桓公。八郡感恩於邵父。覩耕農之蔽野。聽歌吹之沸天。古人有言。爲可爲於可爲之時。則可。其城下宮觀。今欲旋集良工。增修舊址。擬金屋銀堂之制。處處騰光。俾星冠月帔之徒。人人潔跡。微功若就。良願克伸。龍圖早耀於中興。虎旅永摧其大盜。次願太尉運籌佐漢。廻掩張良。拊棹遊湖。靜追范蠡。石留馬跡。臺挂鳳音。蓬島花開。春醉而閒。乘白鹿。芝田雨過。曉耕而長任青牛。罷吟小桂之篇。獨邁大椿之壽。然後仰從翔翼。俯至潛鱗。凡曰含虛。悉能蒙福。但以所修宮觀。荒摧既久。經費甚多。無因獨辦資糧。唯仰衆成功德。迦譚之難捨。能捨。猶見樂輸。道教之自然。而然。辛無輕諾。謹疏。

桂苑筆耕集卷十七

啓四首

初投獻太尉啓

再獻啓

謝生料啓

獻詩啓

詩三十首

七言紀德詩三十首謹獻司徒相公

狀六首

謝職狀

謝借宅狀

出師後告辭狀

謝令從軍狀

謝借舫子狀

謝許奏薦狀

初投獻太尉啓

某啓。伏以嶽之高與海之深。物所歸而人所仰。迥拔千仞。平吞百川。其如巖嶸擎天。波瀾蘸日。豁四方之眼。醒萬旅之魂。是宇內之所歌謠。匪毫端之能贊詠。伏惟司徒相公。獨抱神略。一匡聖朝。譽洽於良哉康哉。名標於可久可大。龔黃德政。則郡民有遺愛之碑。韓白功勳。則國史有直書之筆。況某劣同窺豹。淺比傾螺。難將篆刻之詞。輒頌陶鎔之業。但以間生賢哲。年當五百之期。廣集英豪。客滿三千之數。旣納之似水。則來者如雲。斯乃司徒相公。鏡於心而寬兮。綽兮。稱於事而無偏。無黨。網羅雋彥。籠罩驍雄。於儒則沈謝呈才。於武則關張効力。遂使弓旌招隱士。巖谷爲之一空。介冑降叛夫。烟塵爲之四息。豈獨分憂於闕外。實惟稱慶於寰中。莫不信齊於春夏秋冬。恩播於東西南北。但日月照臨之所。是風雷變化之時。然則尼父堂中。亦有他鄉之子。孟嘗門下。寧無遠地之人。片善可稱。前賢不讓。永能執大邦之政。豈欲遺小國之賢。是以敢寫微衷。輕投朗鑑。某新羅人也。身也賤。性也愚。才不雄。學不贍。雖形骸則鄙。年齒未衰。自十。二始別雞林。至二十則遷鶯谷。方接青衿之侶。旋從黃綬之官。旣忝登龍。敢言絆驥。今者乍離一尉。欲應三篇。更願進修。且謀退縮。獨依林藪。再閱邱墳。課日攻詩。虞納之詆訶無避。積年著賦。陸機之哂笑何慙。俟其敦閱致功。琢磨成器。求魚道在。垂竿而不挂曲鉤。射鵠心專。撻筭而冀銜後鏃。端操勁節。佇望良時。竊見萬物投誠。八紘嚮德。不謁相公賓閣。不遊相公德門者。詞人之所懷慙。羣議之所發誚。某故敢墮肝。

瀝膽進牘抽毫。不避嚴誅。輒申素懇。謹錄所業。習篇章五軸。兼陳情七言長句詩一百篇。齋沐上獻。冒犯尊威。不任戰懼之至。謹啓。

再獻啓

某啓。某今月五日。謹以所學篇章五通。貢於賓次。雖慙獻豕。輒覬攀龍。脩客路以心摧。望仁風以目斷。乍覩秦雲之態。或似美人。細看燕石之姿。恐爲棄物。伏蒙司徒相公。光逾愛日。煦及寒灰。念以遠別海隅。久沈江徼。特垂豐饌。俾濟朝饑。自驚樽櫟之材。已荷稻粱之惠。雖龜魚投水。驟喜命蘇。而蚤蠶負山。深憂力敗。且某也。桑絲雖絡。蛛網自營。萬計尋思。不如學也。百年勤苦。猶恐失之。所以未競宦塗。但遵儒道。筮仕而懶趨塵土。卜居而貪憶林泉。人間之要路通津。眼無開處。物外之青山綠水。夢有歸時。所願更淬鉛刀。終求鐵印。斂跡而踰藏學藪。安身而跌宕詞林。嘗誦古詩。還符此意。云志士惜日短。愁人知夜長。某旣懷志士之勤。又抱愁人之苦。聊憑毫牘。敢述肺肝。且如蹋壁冥搜。杜門寂坐。席冷而窗風擺雪。筆乾而硯水成冰。欲爲尼父之絕編。無奈羲和之促轡。卽可知指萬卷之經史。恨三冬之景光。及其凍枕傷神。孤燈伴影。寒漏則滴殘別淚。遙磻則搗破羈心。空勞甯戚之悲歌。莫繼陸機之安寢。亦可想貯千端之鬱邑。過五夜之寂寥。然則志士之勤也。旣如彼。愁人之苦也。又如此。況某家遙日域。路隔天池。投客舍而方甚死讎。指何門而欲安生計。唯慮道之將廢。豈言人不易知。不敢以陋質凡姿。覲相公清嚴之德。不敢以片言隻字。希相公採錄之恩。所望者。或以其萬里地遠來。十餘年苦學。稍垂惻憫。得濟困窮。則必堅背水之心。終

爲勇士。決移山之志。不讓愚公。伏以某譯殊方之語言。學聖代之章句。舞態則難爲短袖。辯詞則未比長裾。舌無三寸之能。空緘壯氣。腸有九迴之懇。但戀深恩。干浼尊嚴。下情無任感戴兢惶涕泗之至。謹啓。

謝生料啓

某啓。某昨日伏蒙仁慈。再賜生料。恩垂望外。喜集愁中。安貧而已。瞻晨炊。感德而唯知宿飽。遂使范家釜。甌免恨長閒。顏巷簞瓢。倍加其樂。伏以某雖楊曾穿葉。而蓬且斷根。空把利錐。冀遇大賢之鑑。豈將長鋏。先興下客之歌。一昨輒貢蕪音。累塵尊聽。窺德宇而燕雖相賀。望威風而鶴恐退飛。豈料司空相公。俯念海人。久爲塵吏。特垂記錄。繼賜沾濡。前生之溝壑無虞。饑寒雖濟。頭上之邱山漸重。負戴難勝。依投而既類窮猿。展效而願同病雀。下情無任云云。

獻詩啓

某啓。某竊覽同年顧雲校書。獻相公長啓一首。短歌十篇。學派則鯨噴海濤。詞鋒則劍倚雲漢。備爲贊頌。永可流傳。如某者。跡自外方。藝唯下品。雖儒宮慕善。每嘗窺顏冉之牆。而筆陣爭雄。未得摩曹劉之壘。但以幸遊樂國。獲覩仁風。久貯懇誠。冀伸歌詠。輒獻紀德絕句詩三十首。謹封如別。定王拙舞。適足自嫌。嫫母濃粧。轉爲人笑。不足贊揚。休烈。翻憂浼黷。尊威。然聖人以激勸誠深。不問互鄉童子。學者以揣摩志切。皆投鬼谷先生。伏惟特恕荒蕪。俯垂采覽。所冀趨仁化於江北。終得傳美譚於海東。唐突藻鑑。下情無任戰慄之至。謹啓。

七言紀德詩三十首謹獻司徒相公

兵機

惟將志業練春秋。早蓄雄心剗國讎。二十年來天下事。漢皇高枕倚留侯。

筆法

見說書窗暫臥龍。神傳妙訣助奇鋒。也知外國人爭學。惟恨無因乞手蹤。

性箴

波澄性海見深源。理究希夷闢道門。詞翰好傳雙美跡。何須更寫五千言。

雪詠

五色毫編六出花。三冬吟徹四方誇。始知絕句勝聯句。從此芳名掩謝家。

射鵬

能將一箭落雙鷗。萬里胡塵當日銷。永使威名振沙漠。犬戎無復吠唐堯。

安化

班筆由來不暗投。旋驅熊隼待封侯。郡名安化能宣化。更指河湟地欲收。

練兵

隴水聲秋塞草閒。霍將軍暫入長安。太平天子憐才略。曾請陳兵盡日看。

南朝蕭子雲善書。百濟使人求手蹤。以爲國寶。

礮溪

刻石書蹤妙入神。一迴窺覽一迴新。況能早遂王師業。桃李終成萬代春。

伏觀相公礮溪詩云。及到王師身已老。不知辛苦爲何人。又經被縣時

云。手栽桃李十餘春。今日經過重建勳。

射虎

鋸牙鉤爪礙王程。一箭摧斑四海驚。口額前驅姜膽碎。方知破石是虛聲。

秦城

遠提龍劍鎮龍庭。外房從茲永罷局。掃盡邊塵更無事。暮天寒角醉吟聽。

生祠

古來難化是蠻夷。交趾何人得去思。萬代聖朝青史上。獨傳溪峒立生祠。

射鞭

休說戟枝非易中。莫言楊葉是難穿。須看立節沙場上。永得安邊爲射鞭。

安南

西戎始定南蠻起。都護能摧驃信威。萬里封疆萬戶口。一麾風雨盡收歸。

天威徑

鑿斷龍門猶勞身。擘分華嶽徒稱神。如何劈開海山道。坐令八國爭來賓。

峇口徑

濟物能迴造化心。驅山偃海立功深。安南真得安南界。從此蠻兵不敢侵。

收城碑

功業已標征北賦。威名初建鎮南碑。終知不朽齊銅柱。況是儒宗綴色絲。

碑今度支裴僕射撰詞。

執金吾

一陣風雷定八蠻。來趨雲陛悅天顏。王孫仕宦多榮貴。心爲匡君不暫閒。

天平

海岱煙塵匝鄆城。遙揮一劍落欃槍。征旗不動降旗盡。永使天平地亦平。

釣魚亭

錦筵花下飛鸚鵡。羅袖風前唱鷓鴣。占得仙家詩酒興。閒吟煙月憶蓬壺。

伏觀相公在鄆州詩云。酒滿金船花滿枝。雙娥齊唱鷓鴣詞。又釣魚亭

詩云。水急魚難釣。風吹柳易低。

相印

早說休徵應佩刀。台星光接將星高。欲迎霖雨歸龍闕。看滅妖氛展豹韜。

西川

遠持龍旆活龜城。威懾蒙王永罷兵。應笑夔巴喚杯酒。雨師風伯自歸行。

平蠻

叩峽關東蠻塵絕。平夷鎮扼蠻地裂。又築羅城變錦城。蠻兵永滅功不滅。

築城

一心能感衆心齊。鐵甕高吞劍閣低。多上散花樓上望。江山供盡好詩題。

荆南

虎吼龍驤出峽來。福星才照陣雲開。遙思屈宋忠魂在。應向風前奠一杯。

漕運

濟川已展爲舟業。煮海終成富國功。能與吾君緩宵旰。爲資心計四方通。

浙西

九江賊膽望風摧。萬戶愁眉向日開。楚舞吳歌一何樂。相逢相賀相公來。

降寇

唯將德化欲銷兵。常笑長平恣意坑。更想太邱行小惠。何如言下濟羣生。

淮南

八郡榮超陶太尉。三邊靜掩霍嫖姚。玉皇終日留金鼎。應待淮王手自調。

·賊起·相公
·皆自討除·

劍南·荆南·淮南·乃天下名鎮·
相公累移節制·西戎·南蠻·東鄙·

朝上清

齊心不倦自朝眞。豈爲修仙欲濟人。天上香風吹楚澤。江南江北鎮成春。

陳情

俗眼難窺冰雪姿。終朝共詠小山詞。此身依托同雞犬。他日昇天莫棄遺。

謝職狀

右某。今月二十五日。伏奉公牒。特賜署充館驛巡官者。恩降台階。光生旅舍。承命而吟。魂乍懾。叨榮而病。骨能蘇。攀依有心。荷戴無力。伏以某。櫟生曠野。莠託荒田。豈惟良匠不窺。抑亦農人見棄。風欲弱植。難舉勢於凌雲。塵織纖莖。但懷愁於委地。昨者不慙狷者。輒效狂生。累貢巴詞。仰黷秦鑑。伏惟司徒相公。念某來從異域。遠寓樂郊。俯愛似龍。不嫌非鳳。拔衰英於糞上。搜滯刃於獄中。許廁嘉賓。仍沾厚俸。神仙見顧。稍親郭隗之臺。驚蹇何施。得主鄭莊之驛。況乃念子襟之志業。辱華袞之褒詞。刻畫恩深。已能長價。琢磨志切。終願成功。修身則飲水懷冰。鍊思則吟煙嘯露。唯當勵節。以謂報恩。謹詣衙門。祇候陳謝。下情無任感激。彷徨榮懼之至。謹狀。

謝借宅狀

右某。昨日客司奉傳處分。借賜官宅安下者。仰聆尊旨。俯省庸才。既榮投跡之有門。唯恨殺身之無路。伏以某。自趨龍旆。免泣牛衣。職俸非輕。書糧頗贍。嘗讀魯論語曰。學而優則仕。仕而優則學。是以望東開之。

罔永誓依仁。坐北面之窗。唯期肄業。非敢隱居而不嫁。祇將直道而自媒。今者幸寓樂郊。況棲靜室。箠屨則不勞涉遠。簞瓢則永遂安貧。豈謂愛閒。誠堪養勇。三年就學。非缺慕藺之心。一日成功。願滿依劉之志。下情無任感恩激切兢惕之至。謹詣衙門。祇候陳謝。謹狀。

出師後告辭狀

右某伏念來從異域。託在德門。昔曾名列桂科。未知稱意。今忝職居蓮府。始覺榮身。恩既厚於稻梁。跡能安於萍梗。日增學植。月瞻書糧。豈期市駿之金。傍沾鶯塞。惟愧封侯之印。未效禎祥。今者屬以大慙。逋誅中朝多難。頃煩豹略。佇滅豺聲。伏惟太尉相公。身耀福星。均臨庶類。手傾霖雨。遍洗妖氛。遠命舟師。重興國祚。華夷則望風競抃。蠡植則剋日當蘇。若某者。空有肺腸。方申禱祝。恨無羽翼。一遂奮飛。望龍節以魂銷。窺虎威而股慄。雖則熊羆之力。共喜安人。其如犬馬之心。常增戀主。下情無任攀依激切泣涕之至。謹狀。

謝令從軍狀

右某適見客司奉傳處分。令借舟船。隨從行李者。深恩既降。壯氣潛伸。勵心而願效驅馳。感德而難勝踴躍。伏以某塵中走吏。海外腐儒。五能非自濟之資。一割無可施之處。惟增慷慨。已分沈淪。豈無投筆之心。時應未偶。空有請纓之志。力且難成。誰謂忽被殊私。不遺賤跡。許隨旌旆。借賜舟航。蹇足無堪。敢望維駒之念。麼委何幸。遽叨泛鷁之榮。況當泣路之時。永荷濟川之賜。下情無任感戴欣躍兢惕之至。謹狀。

謝借舫子狀

客司奉傳處分。借賜舫子安下者。某方脫窮鱗。得攀畫鷁。自慙跡在塵吏。忽訝身爲水仙。則彼甘寧割錦纜。而呈奢。顧愷毀布帆。而無恙。豈若榮棲德宇。又泛仙舟。風波無失所之憂。煙月有搜吟之暇。況清流滿望。暑氣銷威。每當定志安神。則乃銘肌刻骨。謹課七言長句詩一首。齋沐上獻。于黷台塔。下情無任荷戴兢惕之至。謹狀。

謝許奏薦狀

右某昨日見衙前兵馬使。曠師禮奉傳處分。特賜慰問。兼許奏薦。令自修狀本來者。俯慙蓬跡。仰聽蘭言。喜抃而身輕欲飛。驚惶而心戰難遏。何者。某職叨鄭驛。已謂極榮。名達堯階。實爲過望。憑何展效。佩此恩光。況乃明鑑冰開。英才霧集。所宜倒屣。則先迎王粲。築臺則次接劇辛。如某者。輟耕海上之田。來泣塵中之路。雖云遊學。尙未成功。豈料勤勞。莫副於指蹤。將念已傳於卵翼。許令伐善。將使警愚。每思邠子之驟稱。深慙速謗。欲效黃公之多讓。又怨失時。冀緝拙詞。仰遵嚴命。南宮适之問宣父。實有所歸。東方朔之對漢皇。寧辭自責。既忝風雷之變化。佇期雨露之沾濡。下情無任感戴榮抃兢灼之至。謹奉狀陳謝。謹狀。

桂苑筆耕集卷十八

狀啓 狀二十二
首啓三首

賀破淮口賊狀

賀高司馬官狀

謝職狀

長啓

謝加料錢狀

謝衣段狀

謝借示法雲寺天王記狀

謝示延和閣記碑狀

謝改職狀

謝探請料錢狀

與恩門裴秀才求事啓

前湖南觀察巡官裴瓌啓

獻生日物狀五首

端午節送物狀二首

謝新茶狀

謝櫻桃狀

謝冬至節料狀

謝寒食節料狀

謝社日酒肉狀

謝匹段狀

賀破淮口賊狀

右某昨日竊聆淮口鎮狀報。今月八日。諸軍合勢殺戮狂賊已盡者。伏以徐州賊黨。偶因嘯聚。敢恣喧張。鳴梟同巢。勢必不久。蟻蝨相弔。生能幾何。猶懷拒轍之心。未有返轅之意。伏賴太尉相公。雄聲遠振。妙略潛施。謀安四方。決勝千里。遂使淮山樂境。長承虎豹之威。泗水孤城。免作鯨鯢之餌。功著於暫。勞永息。計資於彼。竭我盈。小盜旋除。中興可望。三軍之勇氣方振。百姓之驚魂再蘇。但仰恩威。咸增抃躍。謹祇候陳賀謹狀。

賀高司馬除官

某啓。伏承司馬二十五郎榮膺寵命。伏惟感慰。伏以漢朝美仕。稱太傅少傅之榮。晉代高流。誇大阮小阮之譽。然而但欲脫身於利祿。無非縱志於歌吟。於臣則虧報主之誠。爲子則失榮親之節。豈期太尉相公。重言天應。美命風行。遂令司馬二十五郎。挂綵衣。披朱紱。動高堂之喜色。振德宇之嘉聲。佐理多閒。藹餘芳於玉樹。連官獨貴。掩前哲於竹林。某每愧小儒。忝棲大廈。觀鷓鴣之逸勢。貯燕雀之歡心。下情無任抃躍之至。謹奉啓陳賀。謹啓。

謝職狀

右某志雖求己。藝不及人。伏蒙太尉相公仁慈。肉被摧骸。翼成蝦卵。難飾片言。隻字。粗伸感德。懷恩。今則苟貯血誠。敢憑毫素。先甘鼎鑊。仰黷旌幢。謹具長書。咨陳下情。無任戰灼之至。伏惟特寬罪誅。俯賜念察。謹狀。

長啓

某啓。某伏以短綆不可以汲深。頑鋒不可以刺滯。是故不能者止。周任有言。自宜量力而行。豈可從心所欲。某東海一布衣也。頃者萬里辭家。十年觀國。本望止於榜尾科第。江淮一縣令耳。前年冬。能離未尉。望應宏詞。計決居山。暫爲隱退。學期至海。更自琢磨。俱緣祿俸無餘。書糧不濟。輒攜勃帶。來掃膺門。豈料太尉相公。迴垂獎憐。便畧職秩。跡趨鄭驛。身寓陶窗。免憂東郭之貧。但養北宮之勇。去年中夏。伏遇出師。忽賜招呼。猥加驅策。許隨龍旆。久倚鷁舟。每恨布鼓音凡。鉛刀器鈍。縱傾肝膽。莫副指蹤。遽蒙念以慕善。依

仁特賜奏薦。重言天應。忝獲超昇。若非九重倚賴於功名。十道遵承於法令。則其恩命。亦豈肯許。某自江外一上縣慰。便授內殿憲秩。又兼章紱。且見聖朝簪裾烜赫子弟。出身入仕。二三十年。猶挂藍袍。未趨蓮幕者多矣。況如某異域之士乎。昔有一日九遷。無以及斯榮盛。某嘗讀魯論。見仲尼使漆雕開仕。對曰。仕進之道。未能究習。善其深志。夫子致悅。某雖慙不敏。竊有慕焉。昨蒙恩慈。特賜轉職。尋已具狀陳讓。兼納所賜公牒。伏奉批誨。卽有勅命。但請收之。某旣蒙未允至誠。固且仰遵嚴旨。立愧形影。坐驚神魂。每當夜對寒缸。曉窺清鏡。感激而頤橫涕雨。憂惶而背浹汗漿。雖榮擺脫於風塵。倍赧污黷於門館。伏以太尉相公。雄名峻望。碩德茂勳。不唯雲覆九州。抑亦風揚萬國。寓目傾耳。仰爲指南。儒武所歸。一人而已。是以諸道景附。馬首是瞻。其如都統巡官。須選人材稱職。外塞四方之望。內資十乘之威。若今某塵玷恩知。尸素缺位。但恐買戎狄之笑。沾史傳之譏。昔漢朝金日磾。常在武帝左右。帝欲別加寵遇。日磾辭曰。臣外國人。且使匈奴輕漢。某今日之請。實在於茲。諸廳郎官。早陳公議。蓋以賤無妨貴。欲令夷不亂華。某伏自前年。得在門下。更無知識。唯謁諸廳幕中垂情。幸而獲宥。竊聆太尉相公。去年夏於東塘顧問某之時。諸郎官同力薦揚。和之如響。遂沾厚遇。遵竊殊榮。昨者繼陳讜言。不徇尊旨。實乃惜太尉相公之名望。存淮南藩府之規儀。事體不虧。裨贊斯在。冬末面奉處分。欲使別開院宇。雖承恩諾。轉切憂懷。何者。六韜曰。人才大小。猶如斗也。不可盛石。滿則棄矣。故孔子云。孟公綽爲趙魏老。則優。不可以爲滕薛大夫。今者甘寘嚴誅。輒傾真懇。乞解所職。以弭官謗。可也。伏惟太尉相公。特賜允從。令得其所。儻蒙未垂擯棄。猶許依棲。則望

或別補冗員。或薄支虛給。一枝數粒。可養羽毛。斗水尺波。得安鬢鬢。固非矯飾廉讓爲名。實願揣量分涯。免成負累恩德。春秋齊侯使敬仲爲卿。辭曰。羈旅之臣。免於罪戾。施於負擔。所獲多矣。敢辱高位。請以死告。使爲工正。不失令名。故事昭彰。卑誠悃悃。守道而得無慳矣。登門而免見眴之。但願藥白留恩。終有凌雲之望。著簪挂念。永無委地之愁。干冒台威。下情無任懇迫憂兢之至。謹啓。

謝加料錢狀

右某今日某官奉傳處分。每月加給料錢二十貫者。某厚沾職俸。過贍書糧。羝羊之角。且不羸。鼯鼠之腹。能易滿。惟憂福盛。難報恩深。豈料筆端乏白鳳之詞。日無可效。囊底獲青蚨之術。月有所增。但懷臨谷之心。恐敗負山之力。惟願除供陋巷之食。分濟遠鄉之親。同感厚恩。永傳遐俗。或成浮費。必速幽誅。下情無任荷戴兢惶涕泣之至。

謝衣段狀

某啓。伏蒙恩慈。賜及生衣段一十匹者。伏以風雖解愠。日可畏威。始當蒸鬱之時。忝受鮮華之賜。敢效八公之侶。欲銜六銖。但隨百姓之歡。同歡五袴。況乃某幸趨台陞。榮託德門。實資千載之遭逢。每濟四時之服飾。愍念而情踰父母。稱揚而禮異賓僚。今者輕縠衫材。細練構制。俾趨儉幕。許曳鄒裾。雖恩耀遠人。足呈妍於鮫室。而名慙奇士。甘致刺於鵜梁。下情無任感戴之至。

謝借示法雲寺天王記狀

某啓。昨日伏蒙恩慈。借示修法雲寺天王碑。綵毫乍閱。俗眼初醒。唯慙鐵印之庸流。忽覩銀鉤之妙迹。旣成國寶。豈許家藏。竊聆將勒貞碑。始揮神筆。風亭減暑。天酒呈祥。固知垂露之蹤。便成甘露。況假崩雲之勢。永耀法雲。宜乎琬琰之詞。鎮彼瑠璃之地。共傳嘉瑞。永振芳聲。然則隋煬帝之故都。永爲寶窟。謝將軍之舊宅。終作福田。下情無任捧讀祈禱榮懼之至。其碑謹專諮納。謹狀。

謝示延和閣記碑狀

某啓。昨日觀察衙推邵宗傳奉處分。賜及延和閣記碑本一軸者。跪展真蹤。仰窺臣節。對銀鉤而手舞足蹈。望玉輦而魂飛膽揚。伏以太尉力贍補天。心勤捧日。遂啓遷都之議。佇聆徙蹕之期。恭候宸遊。儼成壯觀。但以尋章摘句。素非吳主之心。進牘抽毫。唯在陳王之命。爰令幕客。謹撰碑詞。支使侍御。邱門顏回。融帳盧植。能揮真筆。妙寫尊襟。敍三年望幸之丹誠。則鼓傳衆聽。述一片勤王之忠節。則鏡照羣迷。實乃酣飲德馨。備陳事實。永使奇功祕略。皆令陋古榮今。太尉相公。志切迎鑾。喜勝覽檄。旣贊美於凌雲百尺。將掩能於入木八分。遂乃親染綵毫。俾鑄翠琰。隨手而龍蛇旋活。迎風而劍戟交橫。畫玉點珠。豈可比蘭亭醉本。撇雲挑霧。只宜示蓬島真仙。誰料末儒。亦叨殊貺。輒敢覬覦將願。是知誘諭辱庸。何則名題桂宮。跡隸蓮府。雖忝一時之有遇。實無萬代之可稱。今者支使侍御。以好善心得稽古力。騁真才子之藻思。辱大丞相之筆蹤。推爲賓席殊榮。別是儒家盛事。則彼郭隗受黃金厚禮。虞卿沾白璧深恩。強欲比方。卻成滉灏。然則四方砥墨含筆之士也。莫不競効嘖眉之態。潛希唾口之恩。仰脩脩然。勤慥慥爾。如某者。學海至

海雖云有心。執柯伐柯。猶恐傷手。持弊箒而徒增健羨。遇神錐而便欲投降。唯願讀五千卷之書。庶幾入室。把十九年之刃。無愧發硯。每親仙書。更敦壯志。稍希異闕。黨童子。何敢望儒林丈人。其所賜碑。唯慎捧持。敢於披閱。待過天池之外。遍誇日域之中。想彼驪龍領下之珠。永當減價。巨鼈頭上之客。必欲偷看。下情無任寶玩師仰之至。

謝改職狀

右某伏蒙仁恩。特賜公牒。改署館驛巡官。今隨旌旆西去者。雖命重難荷。而身輕欲飛。稱心懷捧檄之榮。滿口詠從軍之樂。唯慙幽劣。有辱獎憐。感恩而既識海深。舉步而但憂冰薄。況無孫搴之精騎。自比顏峻之小兒。將何以剖析事機。游揚德業。然所願者。得睹龍飛玉劍。豹製牙旗。風雷振大捷之聲。日月照中興之運。則某也有望於一言長價。或爲天上之人。萬里從知。免作池中之物。行唯踴躍。坐則瞻祠。下情無任榮抃兢灼之至。謹齋沐祇候陳謝。

謝探請料錢狀

某啓。某頃者西笑傾懷。南音著操。蓬飛萬里。迷玉京之要路。通津桂折一名。作金勝之懸疣。附贅。乃是常常之事。徒云遠遠而來。海隅未覺於榮家。江徼況勞於佐邑。由是詠南陔而引咎。望東道以知歸。伏蒙太尉念掃德門。許遷代舍。濡毫染牘。深慙雪苑之清才。頂豸腰魚。遽忝霜臺之峻秩。傳天上披衷之命。榮日邊垂白之親。以宣父見知。則實同陳阜。以遠人多幸。則不讓漢貂。雖乖就養無方。久想宗族稱孝。然而煙

波阻絕。難中負米之心。風雨淒涼。空灑梁山之泣。旣疏溫清。又闕旨甘。但切責躬。敢言養志。況又無鄉使。難附家書。唯吟陟岵之詩。莫遇渡溟之信。今有本國使船過海。某欲買茶藥。寄附家信。伏緣蹄涔易竭。溝壑難盈。不避嚴誅。更陳窮懇。伏惟太尉。念以依門館次三千客。別庭闈已十八年。旣免行傭。有希反哺。特賜探給三箇月料錢。所冀祿遂及親。遠分光於異域。志能求己。永投跡於仙鄉。干瀆台階。下情伏增感泣。兢慙懇迫之至。其請錢狀。別具上呈。云云。

與恩門裴秀才求事啓

某伏念身托德門。光生異域。雖池蛟得雨。無沈埋末路之憂。而海燕含泥。有點汚畫梁之罪。跡賤而兢惶。倍切。恩深而展効。何期。豈合更寫卑誠。仰塵尊德。但以事非獲已。情或可哀。不辭鈇鉞之誅。冀滿斗筲之望。伏緣某昨聆座主侍郎主銓。東洛道路不通。且在襄州。行李極困。早欲發遣專使。切緣力未副心。今有諸兄弟裴。遠將窮懇相告。輒具別狀。干瀆台階。下情無任戰灼之至。

前湖南觀察巡官裴瓌啓

右件人是某座主侍郎再從弟。某去乾符三年冬。到湖南起居座主侍郎之時。見於諸院弟兄中。偏所記念。自數年繼遭剽劫。生計蕩盡。骨肉凋零。久在江南。近投當府。願披情懇。泣告尊慈。駐留多時。不幸疾苦。遂且扶持發去。云欲逕往襄陽。迎接侍郎。今得書云。行至潞州。前去未得。道途旣阻。溝壑是虞。況乃孤孀三十餘口。更無產業。未卜定居。伏緣某家寄日邊。路踰天外。杳無來信。固絕他圖。旣無寸土。以分耕寧。有

尺波而假潤。是以不量僭越。輒具薦論。命懸沸鼎之中。目斷台階之下。非不知捋虎鬚之險。非不知探龍頷之難。但緣既忝門生。豈論賓貢。鴛鴦之與螻蟻。感恩皆同。多士之與遠人。報德何異。伏乞太尉相公。念以程窮計盡。缺其柱促聲哀。特賜於廬壽管內場院。或堰埭中。補署散職。所冀月有俸入。便獲安家。裴瓌卽自到襄州。令弟琦。仰副驅策。不度涯分。浼瀆尊嚴。下情無任感泣兢懼之至。

獻生日物狀

某啓。伏以降跡仙山。爲行恩於俗界。挺神維嶽。期定亂於危時。是以杞梓材長。松椿壽永。名字已標於金籙。兵符暫理於玉鈐。伏惟太尉相公。員嶠稟靈。尼邱誕質。大任天降。中庸日彰。四夷識傾膽之門。遠棲仁蔭。萬姓歸返魂之域。盡飽德馨。況今秦甸停氛。鎬京聚孽。息虎旅奔沈之患。望豹篇擒縱之機。暫施決勝之謀。永致昇平之運。則必坐寧環海。後當去會瑤池。五色輕雲。鎮隨行止。千年素鶴。競效驅馳。獨保長生。卻登真位。調鼎佐玉皇之命。銜杯聽金母之歌。自此漢室公卿。仰羨而空知望斷。仙家朋友。相逢而不訝來遲。某居近鼇峯。遇深驥坂。每睹張良之術。唯吟郭璞之詩。喜對今辰。敢陳善祝。龜蛇病骨。叨承救活之恩。雞犬癡心。竊有奮飛之望。下情無任虔禱。依攀欣抃之至。輒以海東藥物。輕贖尊嚴。謹具別幅。伏惟俯賜念察。謹狀。

又狀

某啓。某聆天降賢人。濟天下之人也。是以材合地寶。性契天和。高關德門。深匡帝室。伏惟太尉相公。漢師

仙格魯聖儒機。推心於三代之英。鍊氣於五行之秀。今者正融韶景。共慶誕辰。四方飽開閣之恩。萬族獻稱觴之懇。伏惟龍韜暫展。靜卷妖氛。鳳輦遄歸。永興清運。然後誠白石生之妙術。從赤松子之勝遊。鰲頭擎五色之雲。久勞西望。豹尾指二京之路。暫事北征。佇揚滅寇之勳。便舉朝真之禮。某棲身大廈。祝壽中春。下情無任禱祠歌詠。欣躍之至。謹具別狀。輒申微誠。伏惟恩慈。俯賜念察。謹狀。

物狀

海東人形參一軀。銀裝龕子盛。

海東實心琴一張。紫綾袋盛。

右伏以慶資五福。瑞降三清。中春方盛於香風。上德乃生於遲日。凡荷獎延之賜。合申獻賀之儀。前件人參並琴等。形稟天成。韻含風雅。具體而既非假貌。全材而免有虛聲。況皆採近仙峯。攜來遠地。儻許成功於藥臼。必願捐軀。如能入用於蓬壺。可知實腹。誠慙菲薄。冀續延長。塵蹟尊嚴。倍增戰灼。伏惟俯賜容納。下情幸甚。

蓬萊山圖一面。

右伏以重陽煦景。仙界降真。雖長生標金籙之名。而衆懇祝玉書之壽。前件圖。千堆翠錦。一朵青蓮。雪濤盛出於墨池。鯨噴可駭。雲嶠湧生於筆海。鼇戴何輕。不愧瑣微。輒將陳獻。望臥龍而股慄。隨賀燕以魂飛。伏惟略鑑心誠。俯賜容納。所冀近台座而永安寰海。展仙齋而使對家山。許沾一顧之榮。預報三清之信。

輕黷視聽。下情無任禱祝歌謠兢灼之至。

人參三觔。天麻一觔。

右伏以昴宿垂芒。尼邱降瑞。始及中和之節。爰當大慶之辰。仰沐尊慈。合申卑禮。前件藥物。採從日域。來涉天池。雖徵三極五葉之名。慙無異質。而過萬水千山之險。貴有餘香。不揆輕微。輒將陳獻。所冀海人之藥。或同野老之芹。伏惟特恕嚴誅。俯容情懇。續靈壽則後天而老。駐仙顏而與日長新。下情無任禱祝忻躍兢惕之至。謹狀。

端午節送物狀

織成鞍幞一條。

右伏以晏陰將定。令節俄臨。遇天地之仁時。睹江淮之樂境。伏惟太尉。應五百年景運。用八千歲爲春。仰贊薰風。高揚畏日。不假渡瀘之役。自成匡漢之謀。甘忝在末寮。合陳微禮。前件鞍幞。鴛機呈妙。獸錦成華。當憩影於追風。或資光於照地。伏願鞍也助百福永安之慶。幞也表四方率服之誠。干黷尊嚴。下情無任禱祝兢惶懇激之至。伏惟俯賜容納。謹狀。

雪扇一柄

右伏以星火揚輝。雲峯聳影。遇陳太守饗遙祠之節。效華封人祝仙壽之誠。前件扇。細糝飛綿。輕鋪凍練。雖假丹青之跡。實含潔白之姿。裁規則不學齊紈。空誇圓月。委質則願依孫閣。得振仁風。謹獻台塔。無任

悚慄伏惟俯賜容納百生榮幸謹狀。

謝新茶狀

右某今日中軍使俞公楚奉傳處分送前件茶芽者伏以蜀岡養秀隨苑騰芳始興採攝之功方就精華之味所宜烹綠乳於金鼎泛香膏於玉甌若非精揖禪翁卽是閒邀羽客豈期仙貺猥及凡儒不假梅林自能愈渴免求萱草始得忘憂下情無任感恩惶懼激切之至謹狀陳謝謹狀。

謝櫻桃狀

右中軍使俞公楚奉傳處分伏蒙賜及前件櫻桃者伏以三春之下始閱羣芳百果之中獨誇先達綴仙露而堪教鳳食被德風而皆許鶯含遂令摘自喬枝分其美實豈期末品亦荷深恩捧持而色奪楚萍咽噀而味欺蘇橘何必貯赤瑛盤上最宜對白玉樽前勻排萬顆之珠不唯眼飽似服一丸之藥便覺身輕下情伏增感戴之至謹奉狀陳謝謹狀。

謝冬至料狀

右伏蒙仁恩特賜前件節料者伏以某忝棲德宇不愧異鄉萬里滄波雖恨絕東來之信三冬愛日且歡迎南至之辰豈料尊慈別垂厚賜玉粒既資於同穎霜華乃出於兩歧不勞大嚼之言卻懷中聖之慮莫識酬恩報德唯知飽食醉吟下情無任兢懼之至謹狀。

謝寒食節料狀

右伏蒙仁慈特賜前件節料米麪羊酒等者。伏以缺人舉令。回祿沮威。正吟化俗之仁風。又對順時之甘雨。仰沾豐餼。過贍新炊。況乃蟻慕芳羶。蛆浮清醞。捧恩光而飽飫。豈止三朝。玩春色而醞酣。可期千日。祇知歌詠。何報陶鈞。下情無任感戴之至。謹奉狀陳謝謹狀。

謝社日酒肉狀

右伏蒙仁慈特賜前件酒肉等者。伏以候燕應期。句龍受祀。一半之韶光欲老。千般之旅思相攻。只知吟樂國之春。豈料捧仙家之賜。陵分甘臘。淮減香醲。想田夫醉舞之場。起海客狂歌之興。敢效陳平壯志。便發大言。唯尋徐邈前蹤。略拌中聖。其肉並酒。謹跪領訖。下情無任感戴之至。謹狀。

謝匹段狀

緋羅。紫綾。紫天淨紗。紫平紗。黃平紗。黃綾。黃絹。熟綿綾袴段。

右伏蒙仁慈特賜前件匹段。霞舒鳳縷。雪疊蛟綃。猥分絳帳之餘。俾換褐袍之飾。不學王尼巧說。遽叨盧志殊榮。唯慙螻蟻之姿。不稱蜉蝣之什。但願勵食藜飲冰之節。報披朱拖紫之恩。下情無任感戴兢惕涕泣之至。謹奉狀陳謝謹狀。

桂苑筆耕集卷十九

別紙狀 別紙九首
狀一首

上座主尙書別紙

賀除吏部侍郎別紙

賀除禮部尙書別紙

濟源別紙

迎楚州行李別紙二首

五月一日別紙

謝降顧狀

與金部郎中別紙二首

書十首

與客將書

謝宋絢侍御書

答裴拙庶子書

謝高祕書示長歌書

謝李瑀書

謝元郎中書

謝周繁秀才以小山集見示書

與壽州張常侍書

賀楚州張義府尙書書

與假牧書

上座主尙書別紙

不審近日尊體寢膳何似。道惟滌慮。德以潤身。致五福之併臻。迎百靈之所薦。伏惟節宣無爽。時望有歸。某竊窺曩史之傳芳。備載達僚之晦跡。疏太傅登其祖帳。僅涉沽名。陶朱公泛彼柏舟。未忘邀利。豈若尙書中庸守志。大隱存神。表獨見之能。察未萌之事。遂得高揚素節。夙避危時。到處煙塵。不污指鴻之目。終年雲水。能怡夢蝶之心。然而宸鑑屢回。物情猶鬱。欲作山中宰相。其如天下蒼生。卽期大駕還京。必赴上台虛位。斯乃萬乘瞻矚。四方禱祈。某海燕含泥。忝棲雲屋。池蛟得雨。早脫塵塗。感恩自比於互鄉。仰德但思於闕里。唯願泥沙賤質。永資陶冶深恩。卑情不任攀戀。虔祝涕泣之至。謹狀。

賀除吏部侍郎別紙

某啓。伏承榮膺寵命。伏惟感慰。張司空之一匡西晉。則漢鑑無倫。謝太傅之忽起東山。則烝黎是念。苟欲幽棲悅志。獨處忘懷。絨輝而耻耀秦臺。蘊味而懶調殷鼎。則乃智者仁者。止傳樂山水之名。賢才俊才。盡失脫塵泥之望。羣情久鬱。美命遂行。今者侍郎靜揖巖扉。高提銓管。萬族仰清通之譽。一時進寒素之徒。致使關中之寇孽災消。海內之英雄道泰。近又竊聆風議。仰測天心。必謂文司再歸重德。然則任賢得地。既叶五百年之期。好學趨門。必盈七十子之數。繼集仙遊於蓬島。盛傳儒禮於杏壇。既搜虹玉驪珠。皆成國寶。佇見臺鸞閣鳳。永作家禽。某伏思萬里無依。久勞漂蕩。十年有遇。幸遂奮飛。異鄉榮垂白之親。達路忝披朱之飾。昔名士爲李公御者。喜抃猶多。今遠人稱尼父生徒。光輝無比。陳至懇而喙輸三尺。望深仁而腸結九回。下情無任抃賀踴躍感激之至。伏惟俯賜念察。謹狀。

賀除禮部尙書別紙

伏承天恩。榮膺寵命。伏惟感慰。昔子貢曰。夫子之文章。可得而聞。夫子之言性與天道。不可得而聞也。然則至於四科弟子。窺測尙難。況是萬里遠人。鑽仰何及。固不效尤於篆刻。請益於琢磨。強搜類鶩之詞。是黷猶龍之德。今者遠聆美命。俯切歡心。望峻中臺。迴冠鴛鷺之列。恩深大廈。空傾燕雀之誠。伏惟捨念雲泉。拯民塗炭。輔弼契千年之運。奸雄避七日之誅。某跡忝諸生。身拘倅職。未由陳賀。下情無任抃躍兢惶。禱祝之至。伏惟俯賜念察。謹狀。

濟源別紙

不審近日尊體何似。伏想孟津別壤。沈水清源。風清而欹枕泉聲。雲曉而捲簾山色。既見境含秀麗。固當道脫沖和。伏惟每慎寢興。早歸雙理。顯驗月中之夢。贊成天下之春。卑情無任攀戀禱祝之至。謹狀。

迎楚州行李別紙二首

不審近日利涉長淮。尊體寢膳何似。伏以源滋桐柏。浪接蓬萊。雖慙臨鬱燠之期。而宛對清虛之境。開樂鏡而正日月。泛膺舟而況值風調。誰言避地之行。實叶濟川之業。伏惟緩飛仙棹。靜運真筌。庶納休禎。每加遵護。卑情懇望。謹狀。

又

某啓。今月某日專使至。伏蒙恩慈。特降尊誨。跪讀欣抃。不任下情。伏審尙書遠赴天庭。將遵水道。整蘭橈而思郭泰。指桂苑而訪劉安。睹神仙則楚俗皆驚。聞雅頌則魯儒相賀。況某材實慙於楛矢。跡嘗列於蓬壺。爲倚德門。獲棲候府。今者佇迎鶴駕。卽覲龍章。既知天幸遭逢。唯切日深踴躍。且曾誓陳浴沂之志。只見虛談。仲由悅浮海之言。終非實事。輒以管窺。藉擊。真爲古陋。今榮。卑情無任攀戀欣抃。兢惕之至。云云。

五月一日別紙

某啓。伏以黃雀風高。蒼龍星耀。弄雨而梅雖應夏。鋪煙而麥已驚秋。時定晏陰。缺資全德。伏惟尙書處身無躁。深守禮經。視履考祥。雅符易道。恬澹則老聃讓美。清虛則周顛懷慙。冰光長泛於玉壺。豈須獨映。天意久留其金鼎。唯望親調。方當鷁泛仙舟。必見鳳銜睿筆。入康帝室。永福寰區。下情無任虔禱。鬱戀激切。

之至謹狀

謝降願狀

某啓。某未遂山棲。尙從塵役。所居官舍。深在軍營。雖異衡門。實同陋巷。旣乏君章之蘭菊。可襲馨香。空餘仲蔚之蓬蒿。偏資寂寞。春日則蝶牽晝夢。秋風則蛩助夜吟。以此爲娛。無他所觀。今者方經離亂。再獲起居。但喜攀父母之恩。卻慙下兒女之淚。況某叨榮奉爵。就學漢儀。姜維之膽氣雖羸。鄧艾之口詞甚訥。唯深感激。莫備啓陳。伏蒙尙書。念以遠方。察其獨立。俯憐素念。每煦溫顏。適及階及席之言。佇銘骨銘肌之懇。早來又蒙降三清之僊駕。顧一畝之窮居。方慙隨入室之賢。豈料忝式廬之念。非所敢望。將何自安。莫不思光遠耀於殊鄉。卑迹永超於末路。揣庸賤則華夷有隔。較輝榮則古今無倫。數年乖豹隱之期。常低俗眼。此日觀鳳儀之後。裕展愁眉。下情無任感戴。欣抃兢惕之至。謹祇候起居陳謝。謹狀。

與金部郎中別紙二首

不審近日尊體寢膳何似。旣明且哲。則詩美賢人。視履考祥。則易稱君子。旣樂持盈之道。固安養素之機。况屬遲日載陽。光風遍煦。燕歌鶯舞。深資酌桂之歡。智水仁山。靜悅據梧之興。伏惟永資景福。早副急徵。鄒元賞於煙霞。濟蒼生於塗炭。羣情禱望。天下幸甚。謹狀。

又

某啓。某仰密格言。側窺性行。人能宏道。賢臣以致堯舜爲先。世實須才。俊士以效巢由是恥。古者只傳於

方策今也。共仰於德門。伏惟郎中。大雅含清。中庸處厚。既以高名肅物。能將全德鎮時。拄清空而嶽頂無雲。瑩秋色而潭心有月。比者蘭拋粉闥。竹領朱轡。出分天子之憂。來慰海人之望。況彼郡也。戶吞越水。窗列吳山。得袁宏舉扇之風。靈濤宿怒。使謝運枉帆之路。釣渚含春。及其五袴傳歌。百錢流譽。尋迎睿渥。遙陟華資。懷寶令名。誰發迷邦之問。司珍正位。佇成匡國之謀。而乃得之若驚。直而不倨。選勝於巖軒。潤戶貪歡於酒賦。琴歌久聆。萬乘虛懷。忍見四方失望。今者梟聲向息。鳳紀重興。晉傅長才。待示指南之制。魏牟積變。佇申拱北之誠。入覲奠階。坐調梅鼎。豈止應月中之夢。必期成天下之春。然則致堯舜之大猷。永匡宸辰。效巢由之小節。不改尊襟。某遠賣鮫綃。慙非重價。仰趨馬帳。忝預生徒。下情無任攀戀。禱祝兢惕之至。云云。

與客將書

某腐芥無依。斷蓬自役。長走而未離塵土。獨行而轉困路歧。昨者遠抱危誠。專趨朗鑑。竽聲恐濫。琴調空悲。伏蒙將軍。念某來自異鄉。勤於儒道。曲垂提挈。得遂獻投。指喻情深。師冕不爲瞽者。獎知音重。卞和免作罪人。荒淺何堪。輝榮已極。但以某無媒進取。有志退居。以詩篇爲養性之資。以書卷爲立身之本。卻緣雖曾食祿。未免憂貧。趙囊則到處長空。范甑則何時暫熱。況乃家遙四郡。路隔十洲。窮愁則終夜煎熬。遠信則經年隔絕。時情冷澹。俗態澆訛。買笑金則易求。讀書糧則難致。天高莫問。日暮何歸。始知學者之心。須托至公之力。今幸遇相公。山包海納。雨潤風行。有片言可獎者。稱譽出羣。有小技可呈者。隨材入用。是

以無一物不歸美化。無一夫不荷深恩。然則舉中國之人。咸承煦育。豈可令外方之士。獨見棄遺。某不揆庸才。敢投清德。豈料將軍許垂拯拔。每賜吹噓。他人之得喪榮枯。皆推命分。小子之昇沉進退。只在恩私。儻或特假重言。終榮賤質。唯托針能入線。則同錐得處囊。某已倚宦途。粗諳吏道。如能驅策。未必陸藏。終當富見室家。豈憚職榮州縣。實以流年易邁。壯氣難申。唯望庇庥。得期變化。所冀燕棲雲屋。永無巢幕之危。鶴出塵籠。稍識乘軒之便。今欲專修啓事。再獻相公。少申感謝之懷。預寫辭違之懇。未知可否。先取指麾。且某也姜維之膽氣。雖麤。鄧艾之口辭。甚訥。縱申拜謁。難具啓陳。聊托牋毫。代披肝膈。未能患己。先切求仁。將軍之心。若鏡焉。無幽不察。小子之身。猶箭也。唯命是從。干浼既頻。慙惶益切。伏惟終始俯賜念察。謹狀。

謝宋絢侍御書

伏蒙殊造。俯念移居。借賜官車。得離旅館。箠笈則免勞自負。簞瓢則各職所安。如承命駕之恩。但勵抹輪之志。今者卜鄰甚靜。學殖可成。惟扃袁粲之門。不掃陳蕃之室。雖乘機立事。輸他附勢之榮。而守道安貧。贏得愛閒之樂。既諧素志。但感深恩。伏惟終始俯賜念察。謹狀。

答裴拙庶子書

某遠離海島。旅宦江皋。比者暫願退居。稍期肄業。來投樂國。冀濟窮塗。本望少瞻山資。便諧谷隱。伏蒙太尉念以雀有多病。鶴自遠來。特署職名。俾趨恩化。尋緣狂花有失。腐芥無依。轉知山鹿野麋。唯宜退縮。永

謂鴻儔鵠侶。不合攀瞻。況乃器比斗筭之人。身隨刀筆之吏。旅舍既拘於雉堞。閒門可設其雀羅。自前年伏承庶子。暫阻朝天。偶來避地。便欲托金牌之幸會。敝玉李之獎憐。專候起居。願搜誠懇。蓋慮跡賤而動多悔吝。才微而易見棄捐。強自微攀舊恩。是爲玷澆清德。以此陸藏形影。綿歷歲時。雖知提筭有門。唯恐負荆無路。豈料庶子。恕以未陳。禰刺先降。劉棧閱溫言而楚纊覆身。捧華翰而隋珠耀掌。兼蒙賢弟起居。未移曩顧。遠賜榮緘。不遺異域之人。特辱同年之字。金膏珠粉。旣垂摩拂之恩。驥尾龍髻。重有依攀之望。莫不驚駘長價。瓴甌生光。不唯誇銜於親朋。實所輝榮於遠俗。謹當占筮撰日。齋沐拜塵。墮肝而盡瀝卑誠。擢髮而少逃厚責。其他所奉尊旨。謹具別狀啓陳。云云。

謝高祕書示長歌書

伏蒙特飛榮誨。寵示長歌。玉海金山。難測高深之本。北方南國。徒觀美麗之姿。贊詠無塔。師資有路。正如青蓮居士。唯誇散誕之詞。白石山人。只騁荒唐之作。但以風月琴樽爲勝槩。不以君臣禮樂爲宏規。遂使千年萬年所流傳。皆嗟大雅小雅之淪弊。今覩四十三叔。行出人表。言成世資。弄才子之筆端。寫忠臣之襟抱。在今行古。旣爲儒室之宗。憂國如家。固是德門之事。天有耳而必當悔禍。雲無心而亦可銷兵。一言自此興危邦。六義於斯歸正道。則所謂陳平宰社。爾曹何知。鄧艾畫營。其志不小。永言他日。足驗前程。某畏影雖迷。偷光匪懈。旣知閱寶。直若發蒙。唯願將鵬舉篇章。傳於異域。豈獨以伯魚對答。誇向同聲。下情但增感戴。欽仰嗟歎之至。續專祇候陳謝。

謝李瑄書

某啓。某今月十日。得祇候見太尉。渤海風息。蓬萊路通。慙非席上之珍。謬作壺中之客。伏蒙顏溫見煦。陌質增榮。鳳翼龍鱗。終容攀附。癡鷹鈍犬。特許指呼。勉其檢慎之心。諭以獎憐之意。此皆副使不遺薄藝。累發重言。始當獨臥北窗。如蛙跳井。豈料榮趨東閣。似鶴乘軒。風雲旣識於因依。冰谷不遑於安處。感唯以泣。誠止無言。伏緣旣忝從軍。難爲乞假。不獲祇候陳謝。

謝元郎中書

某啓。伏蒙太尉恩慈。特賜轉職。不任歡慶。某元菴微儒。焦螟瑣質。早因慕善。偶獲成名。爾後客路多愁。侯門寡援。麻衣始染於藍色。竹簡尋推其桂香。伏自去年。刺謁燕臺。職叨鄭驛。皆蒙郎中。推心獎念。假力薦揚。使孤根無委地之虞。短翮有凌雲之望。今者忽忝非常之遇。深慙不稱之譏。雖樂從軍。安敢尸祿。且鷄披隼翼。已覺非宜。雞處鶴羣。固當自責。時日已具狀辭讓。以此未敢祇候陳謝。伏蒙恩私。特降榮誨。奉讀欣抃。不任下情。

謝周繁秀才以小山集見示書

昨日早謁元成。晚歸弊止。覺戶庭之發光彩。聞几案之散馨香。遂因驚訊僕夫。果得捧承留示。溫辭一幅。粲然受益之規。雅什九篇。蔚矣患多之思。莫不振紀綱於六義。飾冠冕於七言。旣崇大雅之基。實播中和之響。伏以諸從事鴻儔。鵠侶鳳翥。鸞翔集桂苑之名都。占蓮池之雅望。二十三官。卽先輩備觀周樂。深閱

楚材各陳贊詠之詞。能展縱橫之作。筆皆實錄。機不虛張。始窺八首之前。只謂衛多君子。終覽九華之後。方知魯出聖人。某今所以禱望者。翠輦早遇東巡。白環免勞西獻。二十三官。百步穿葉。一飛冲天。姮娥則迎入桂宮。王母則引歸蓬島。然後輟勝遊於御氣。展長策於濟時。來登郭隗之臺。坐弄陳琳之筆。則乃今朝麗藻。已掩八仙公之名。他日賓筵。必盈缺才子之數。見邱門之請禱。待陳榻之解懸。某便欲銜璧乞降。振衣請益。但以志勤詞戰。唯將築室反耕。道拙世塗。僅類杜門卻掃。未獲面申感謝。謹專修狀啓陳。云云。

與壽州張常侍書

當今聖天子在上。賢丞相在下。然而宿德令望可推者。唯我上公。暨滑臺中令兩地而已。初常侍靜芟前弊。權握使符。我上公以理狀聞。請爲真守。帝惟曰俞。後常侍撫安郡俗。振肅兵威。大元帥以雄才薦。請貳前驅。帝亦唯曰俞。是得弄印分榮。剖符行化。踰月報政。盡活疲氓。實謂壽之人永居壽域矣。則乃常侍遇賢丞相之知。入聖天子之用。乃武乃文。多才多藝。固以播在四海。某豈敢一二而談詠也。今所禱願者。碧幢紅旆。高引前途。相幕將壇。別張勝地。謂予不信。神之聽之。

賀楚州張義府尙書書

國家自兵興以來。爵賞旣多。官榮甚峻。然而常恐授受之未能。宜稱盡善盡美。固當有待。今則尙書。以累世勳望。以數年戰功。始假使符。旋迎眞命。某將趨清德。獲聽好音。欣抃之來。雀躍而已。則非獨喜尙書展龔黃之美政。實乃賀聖天子之得良二千石也。伏惟云云。

與假牧書

伏以近日俗尚書題。言矜贊祝。苟非全德。多是愧辭。某執性近愚。處身斯直。以目所覩。以耳所聆。方敢詠歌。固無諂笑。某自達仁境。如歸故鄉。見百姓之安。則知三軍之樂也。見鄉閭之泰。則知郡邑之肅也。若非常侍寬猛相濟。恩威並行。則何以至村落之居。室家相慶。自近及遠。嬉嬉然喜遇慈父。然則政成一境。名達九重。卽計冠聳豐貂。旛纛建隼。榮膺真拜。大洽羣情。某每聽謳謠。深增禱祝。伏惟照察。謹狀。

桂苑筆耕集卷二十

啓一首

謝許歸覲啓

狀三首

謝行裝錢狀

謝再送月料錢狀

謝賜弟棲遠錢狀

別紙五首

上太尉別紙五首

祭文一首

祭嶠山神文

詩三十首

陳情上太尉詩

奉和座主尙書絕句三首

歸燕吟獻太尉詩

酬楊瞻秀才送別詩

行次謝太尉衣段詩

留別女道士詩

酬進士楊瞻送別絕句

楚州張尚書謝相迎詩

酬吳巒秀才絕句二首

石峯詩

潮浪詩

沙汀詩

野燒詩

杜鵑詩

海鷗詩

山頂危石詩

石上矮松詩

紅葉樹詩

石上流泉詩

和友人除夜見寄詩

東風絕句

海邊春望絕句

春曉閒望絕句

海邊閒步詩

將歸海東巉山春望詩

和金員外贈巉山清上人絕句

題海門蘭若柳絕句

謝許歸覲啓

某啓。早來員外郎君。傳奉尊旨。伏蒙恩慈。念以某久別庭闈。許令歸覲者。仰銜金諾。虔佩玉音。雖尋海島。以榮歸。古今無比。且望煙波。而感泣。去住難安。伏緣某自年十二離家。今已二九載矣。百生天幸。獲托德門。驟忝官榮。仍叨命服。一身遭遇。萬里光輝。是以遠親稍慰於倚門。遊子倍榮於得路。唯仰趙衰之冬日。深暖旅懷。豈唯張翰之秋風。遽牽歸思。且緣辭鄉歲久。泛海程遙。住傷烏鳥之情。去懷犬馬之戀。唯願暫

謀東返。迎待西來。仰托仁封。永安卑跡。今卽將期理。但切戀軒。下情無任感戴。兢灼涕泣之至。謹奉啓陳謝云云。

謝行裝錢狀

伏蒙仁慈。特賜錢二百貫。又令辦行裝者。謹依處分。捧領訖。伏以某學虧力行。事過心期。燕鶯銜泥。點污常慙於廣廈。鼈頭抃擻。低徊暗避於連鈎。每慎行藏。深規躁靜。豈謂謙而受益。或希屈以求伸。今者果逢尊慈。令將遠命。榮歸故國。免挈空囊。比陸生南說之囊裝。倍多輝煥。異孔氏東還之輜重。豈慮焚燒。且彼虞卿白璧。郭隗黃金。徒欲耀名。終非濟事。是若念其就養。愍以食貧。減二十日之堂封。濟數千里之家信。累載莫申其勞苦。一朝頓贖於旨甘。寧親而旣佩銀章。倍榮衣錦。戀德而但垂珠淚。願效賣綃。下情無任感恩榮抃。涕戀兢惕之至云云。

謝再送月料錢狀

某啓。昨日軍資庫送到館驛巡官。八月料錢。伏緣某將命遠方。已奉公牒。暫離候館。卽指歸程。旣蒙別賜行裝。豈令缺缺職俸。缺缺難領受。遂便送還。不知庫司具狀申上。上伏奉缺缺者。筆飛雲鳳。顯示深恩。緡耀天龍。仰資厚缺缺。遂還家之望。實驚潤屋之言。遠地賤微。雖有慙於缺缺。故鄉親識。必致敬於金多。通神則益驗魯褒。執癖則缺缺缺缺。伏以尊卑禮隔。辭讓無由。謹依處分。跪領訖。下情無任感恩戀德。激切徘徊兢灼之至云云。

謝賜弟棲遠錢狀

某啓。某堂弟棲遠。比將家信。迎接東歸。遂假新羅國入淮海。使錄事職名。獲詣雄藩。將歸故國。作者伏蒙仁恩。特賜錢三十貫者。伏以崔棲遠。遠涉煙波。大遭風浪。僅存微命。唯有空身。雖志切鵲鶴。竊慕在原本之義。而譽慙騏驎。難期得路之秋。銜蘆而但喜聯行。泛梗而免虞失所。今者某以榮奉使。得遂寧親。貨泉沾潤之名。實稱子母。歸路光榮之事。皆屬善人。下情無任感恩欣躍兢惕之至。

上太尉別紙五首

某啓。昨以鄉使金仁圭員外。已臨去路。尙闕歸舟。懇求同行。仰候尊旨。伏蒙恩造。俯允卑誠。今則共別淮城。齊登海艦。雖慙李郭之譽。免涉胡越之言。路遠無虞。不假琴高之術。巨川能濟。唯懷傳說之恩。下情無任感戀之至。云云。

又

某啓。伏奉手筆批誨。一行人並喜將息穩風濤者。俯顧微流。仰窺尊念。望淮海則陟遐自邇。指風波則視險如夷。遍灑溫言。盡叨恩於挾纊。缺敷至懇。願無愧於賣綃。下情無任感激攀戀兢惕之至。云云。

又

伏奉尊誨。藥袋子懸於船頭。不畏風浪。慎勿開之者。仰掛青囊。遠諭碧海。必使天吳息浪。水伯迎風。既無他慮於葭津。可訪仙遊於蓬島。唯願往來無滯。忠孝克全。萬里安流。永缺濟川之力。百年苦節。不欺臨谷。

之心。下情無任感戴。兢灼之至。

又

某舟船行李。自到乳山。旬日候風。已及冬節。海師進難。懇請駐留。某方忝榮身。唯憂辱命。乘風破浪。既輸宗愨之言。長楫短篙。實涉惠施之說。雖抑資恩。不憚險艱。然正值驚波。難踰巨壑。今則已依曲浦。暫下飛鷹。結茅茨以庇身。糝藜藿而充腹。候過殘臘。決撰行期。若及春日。載陽必無終風。且暴便當直帆。得遂榮歸。謹具別狀。咨申伏惟云云。

又

某啓。自叨指使。唯欲奮飛。必期不讓秋鷹。便能截海。豈料翻成跛鼈。尙類曳泥。雖慎三思而行。且乖一舉之傷。既勞淹久。合具啓陳。某嘗讀國語。見海鳥爰居。止於魯東門之外。展禽曰。今茲海有災乎。夫廣川之鳥獸。常知而避其災。是歲也。海多大風。冬暖。伏見今年。自十月之交。至於周正月。略無鬢發。倍覺溫燠。必恐魯修濫祀。豳改成詩。靜思漢祖之興歌。大風可懼。遙想田橫之窟跡。絕島難依。遂於登舟。近浦止泊。籠鵠無矢。藩羊自安。唯願時然後行。必當利有攸往。泛艤艘而不滯。指渤海而非遙。冀申專對之能。早遂再來之望。伏惟云云。

祭嶼山神文

維年月日。新羅國入淮南使檢校倉部員外郎。守翰林郎。賜緋銀魚袋金仁圭。淮南入新羅兼送國信等

使前都統巡官承務郎殿中侍御史內供奉賜緋魚袋崔致遠等謹以清酌生宰之奠敬獻懸于嶮山大王之靈竊以昔辨方圓始分清濁融作江海結爲山嶽石戴土而土戴石小者礪而大者礪然而罕有威神靜無稜角與堆阜而相接見邱陵之可學惟靈磊磊落落高臨覲壑巉巖崑崑俯壓鯨潭上則爲雲霧縈纏之骨下則爲波濤激射之窟朝則迎金烏而前出夜則送銀蟾而後沒是以峻德能彰乎東夏西夷元功不假乎南嶺北忽則彼織女之機倚河漢秦帝之橋架溟渤徒銜其名莫勞我形每謂蘊藏其片玉豈唯廁列於雙瓊遂使往來者虔度英靈祈禱者盡寫精誠旣蘋蘩之可薦信黍稷之非馨今者仁圭等久銜遠命致遠也始奉殷聘喜歸舟之旣同佇遊轡之能竝不患胡越之意殊寧慙李郭之名盛去歲初冬及東牟東屬以滄流尙遠元律將窮浪形匄匄而鷁難浮艦風響巖巖而鷁恐辭籠遂艤列木聊安斷篷一昨雖迎端月猶懼俊風延頸而待逢候燕回眸而送盡歸鴻方期利涉龜從葦叶直指雞林輕浮芥葉豈輸馳馬之號願較秋鷹之捷遠詣靈峯難尋壽宮但覩其青蓮倒蘸於巨浸碧螺高拄於晴空仰威靈之聳塵外想影響之飄雲中於是潔饋館擇肥醲酒醴斯醑牲牲粗豐謹賚薄禮敢覬陰功伏惟大王潛施呼噏密降指蹤使波神拱手川后斂容楚師之南風且競鄭伯之東道豁通照水鏡之心旣分妍醜璧土囊之口無雜雌雄則可朝穿汗漫暮截鴻濛去採石華必同謝蓮行吟肉脯免效張融加以某臨川自審登木增懷憶昔雪作夜光冰爲夕飲幾年獨勵於鼓篋今日方期於扇枕將問荊州之絹忝披會稽之錦見寵若驚心如捧盈雖智有不逮而時然後行况賫御筆慮滯王程今則裹裝旣飾儼有行色翫淑

景以歌吟。汎安流於瞬息。唯托大王之風。早歸君子之國。俾傳帝命。無曠神職。尙饗。

陳情上太尉詩

海內誰憐海外人。問津何處是通津。本求食祿非求利。只爲榮親不爲身。客路離愁江上雨。故園歸夢日邊春。濟川幸遇恩波廣。願濯凡纓十載塵。

奉和座主尙書避難過維揚龍示絕句三首

年年荆棘侵儒苑。處處煙塵滿戰場。豈料今朝覲宣父。豁開凡眼睹文章。亂時無事不悲傷。鸞鳳高飛出帝鄉。應念洛沂諸弟子。每逢春色耿離腸。濟川終望拯湮沈。喜捧清詞浣俗襟。唯恨吟歸滄海去。泣珠何計報恩深。

歸燕吟獻太守

秋去春來能守信。暖風涼雨飽相諳。再依大厦須知許。久污雕梁卻自慙。深避鷹鷂投海島。羨他鴛鴦戲江潭。只將名品齊黃雀。獨讓銜環意未甘。

酬楊瞻秀才送別

海槎雖定隔年迴。衣錦還鄉愧不才。暫別蕪城當葉落。遠尋蓬島趁花開。谷鶯遙想高飛去。時楊生有隨行之計。遼豕寧慙再獻來。好把壯心謀後會。廣陵風月待銜杯。

行次山陽續家太尉寄賜衣段令充歸覲續壽信物謹以詩謝

自古雖誇畫錦行。長卿翁子占虛名。既傳國信兼家信。不獨家榮亦國榮。萬里始成歸去計。一心先算卻來程。望中遙想深恩處。三朶仙山目畔橫。

留別女道士

每恨塵中厄宦塗。數年深喜識麻姑。臨行爲與真心說。海水何時得盡枯。

酬進士楊贍送別

海山遙望曉煙濃。百幅帆張萬里風。悲莫悲兮兒女事。不須悵悵別離中。

楚州張尙書水郭相迎因以詩謝

楚天蕭瑟碧雲秋。旛傘高飛訪葉舟。萬里乘槎從此去。預愁魂斷謝公樓。

酬吳巒秀才惜別二絕句

榮祿危時未及親。莫嗟歧路暫勞身。今朝遠別無他語。一片心須不愧人。
殘日塞鴻高的的。暮煙汀樹遠依依。此時回首情何恨。天際孤帆窈浪飛。

石峯

中和甲辰。季冬十月。奉使東泛。泊舟於大珠山下。凡所入目。命爲篇名。嘯月吟風。貯成十首。寄高員外。

巉岳絕頂欲摩天。海日初開一朵蓮。勢削不容凡樹木。格高唯惹好雲煙。點酥寒影粧新雪。戛玉清音噴細泉。靜想蓬萊只如此。應當月夜會羣仙。

潮浪

驟雪翻霜千萬重。往來弦望躡前蹤。見君終日能懷信。慙我趨時盡放慵。石壁戰聲飛霹靂。雲峯倒影撼芙蓉。因思宗慤長風語。壯氣橫生憶臥龍。

沙汀

遠看還似雪花飛。弱質由來不自持。聚散只憑潮浪簸。高低況被海風吹。煙籠靜練人行絕。日射凝霜鶴步遲。別恨滿懷吟到夜。那堪又值月圓時。

野燒

望中旌旆忽繽紛。疑是橫行出塞軍。猛焰燎空欺落日。狂煙遮野截歸雲。莫嫌牛馬皆妨牧。須喜狐狸盡喪羣。只恐風驅上山去。虛教玉石一時焚。

杜鵑

石罅根危葉易乾。風霜偏覺見摧殘。已饒野菊誇秋豔。應羨巖松保歲寒。可惜含芳臨碧海。誰能移植到朱欄。與凡草木還殊品。只恐樵夫一例看。

海鷗

慢隨花浪飄飄然。輕擺毛衣真水仙。出沒自由塵外境。往來缺缺洞中天。稻粱滋味好不識。風月性靈深可憐。想得漆園蝴蝶夢。只應如我對君眠。

山頂危石

萬古天成勝琢磨。高高頂上立青螺。永無飛溜侵凌得。唯有閒雲撥觸多。峻影每先迎海日。危形長恐墜潮波。縱饒蘊玉誰回顛。舉世謀身笑卞和。

石上矮松

不林終得老煙霞。澗底何如在海涯。日引暮陰齊鳥樹。風敲夜子落潮沙。自能盤石根長固。豈恨凌雲路尙賒。莫訝低顏無所愧。棟樑堪入晏嬰家。

紅葉樹

白雲巖畔立仙姝。一簇煙蘿倚畫圖。麗色也知於世有。閒情長得似君無。宿粧含露疑垂泣。醉態迎風欲待扶。吟對寒林卻惆悵。山中猶自辨榮枯。

石上流泉

琴曲雖誇妙手彈。遠輸雲底響珊珊。靜無纖垢侵金鏡。時有輕颺觸玉盤。嗚咽張良言未用。潺湲孫楚枕應寒。尋思堪惜清冷色。流入滄溟便一般。

和友人除夜見寄

與君相見且歌吟。莫恨流年挫壯心。幸得東風已迎路。好花時節到雞林。

東風

知爾新從海上來。曉窗吟坐思難裁。堪憐時復撼書幌。似報故園花欲開。

海邊春望

鷗鷺分飛高復低。遠汀幽草欲萋萋。此時千里萬里意。目極暮雲翻自迷。

春曉閒望

山面嬾雲風惱散。岸頭頑雪日欺銷。獨吟光景情何限。猶賴沙鷗伴寂寥。

海邊閒步

潮波靜退步登沙。落日山頭簇暮霞。春色不應長惱我。看看卽醉故園花。

將歸海東巉山春望

日極煙波浩渺間。曉烏飛處認鄉關。旅愁從此休凋鬢。行色偏能助破顏。浪蹙沙頭花撲岸。雲粧石頂葉籠山。寄言來往鷗夷子。誰把千金解買閒。

和金員外贈巉山清上人

海畔雲菴倚碧螺。遠離塵土稱僧家。勸君休問芭蕉喻。看取春風撼浪花。

題海門蘭若柳

廣陵城畔別蛾眉。豈料相逢在海涯。只恐觀音菩薩惜。臨行不敢折纖枝。

